



Broj: 02-04-298/20

Datum, 06.03.2020. godine

ZAPISNIK **sa 34. redovne sjednice 6. saziva Općinskog vijeća Doboj Istok**

Tridesetčetvrta redovna sjednica 6. saziva Općinskog vijeća održana je dana 29.02.2020. godine u zgradi općine Doboj Istok, u Klokočnici, sa početkom u 10,00 sati.

PRISUTNI: 16 vijećnika, Kemal Bratić, općinski načelnik, Omer Hadžić, sekretar općine, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Alirizah Mujkić, pomoćnik općinskog načelnika za poduzetništvo i finansije, Sulejman Delić, pomoćnik općinskog načelnika za civilnu zaštitu i Abdulah Hrnjičić, ovlašteno lice za zamjenjuje pomoćnika općinskog načelnika za prostorno uređenje, Lejla Hasanović, općinski pravobranilac, Faruk Avdagić, komandir Policijske stanice Doboj Istok, Skopljak Eldin, zamjenik direktora JU Mješovita srednja škola Doboj Istok, Mehmed Mehinović – Medle, predstavnik MZ Brijesnica Velika, Mirsad Džebić, predstavnik MZ Klokočnica, Samir Mujkić, stručni saradnik za ruralni razvoj općine, te predstavnik RTV TK.

ODSUTNI: Mirzet Mujkić, vijećnik SDA.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „Selamim i pozdravljam načelnika sa saradnicima, goste, kolegice i kolege vijećnike. Otvaram 34. redovnu sjednicu ovog saziva Općinskog vijeća. Izostanak je najavio Mujkić Mirzet. Molim tehničkog sekretara da nam provjeri prisutnost ostalih vijećnika. Prisutno je 16 vijećnika.“

USVAJANJE ZAPISNIKA SA PRETHODNE SJEDNICE

Dr. Ferid Konjić, predsjedavajući Općinskog vijeća: „Dobili ste zapisnik sa prethodne sjednice i ukoliko ima primjedbi dajem mogućnost da se iznesu. Ne vidim prijavljenih i dajem na izjašnjavaње. Ko je za zapisnik?“

Glasanje: ZA – 16, PROTIV – 0, UZDRŽANIH – 0.

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „Ukoliko ima pripremljenih vijećničkih pitanja i inicijativa dajem mogućnost da se iznesu. Ne vidim prijavljenih.“

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „Dobili ste dnevni red koji je usaglasio Kolegij, a dobili smo i prijedlog za proširenje dnevnog reda, a to je Razmatranje plana upisa učenika u prvi razred srednje škole u školskoj 2020/2021. godini u JU Mješovita srednja škola Doboj Istok. Materijal ste dobili i ako neko ima potrebu nešto da kaže dajem mogućnost. Ne vidim prijavljenih. Ko je za da ide tačka na dnevni red?“

Glasanje: ZA – 16, PROTIV – 0, UZDRŽANIH – 0.

Na ovaj način proširujemo dnevni red za još jednu tačku tako da će biti 14 tačaka dnevnog reda, a ova tačka će biti 14. Ko je za kompletan dnevni red?

Glasanje: ZA – 16, PROTIV – 0, UZDRŽANIH – 0.

Usvojen je sljedeći:

DNEVNI RED

1. Razmatranje i usvajanje prijedloga Odluke o izmjeni i dopuni Odluke o službenom glasilu općine Doboj Istok,
2. Razmatranje i usvajanje prijedloga Odluke o visini prosječne konačne građevinske cijene 1 m² korisne površine građevinskog objekta na području općine Doboj Istok za 2020. godinu,
3. Razmatranje i usvajanje Izvještaja o radu Zajedničkog pravobranilaštva Čelić, Teočak, Sapna i Doboj Istok za 2019. godinu,
4. Razmatranje i usvajanje Izvještaja o radu komunalnog inspektora za 2019. godinu,
5. Razmatranje i usvajanje Izvještaja o radu Savjeta mjesne zajednica Klokočnica za 2019. godinu,
6. Razmatranje i usvajanje Izvještaja o radu Savjeta mjesne zajednica Brijesnica Velika za 2019. godinu.
7. Razmatranje i usvajanje Izvještaja o radu Savjeta mjesne zajednica Brijesnica Mala za 2019. godinu,
8. Razmatranje i usvajanje Izvještaja o radu Savjeta mjesne zajednica Lukavica Rijeka za 2019. godinu,
9. Razmatranje i usvajanje Izvještaja o radu Savjeta mjesne zajednica Stanić Rijeka za 2019. godinu,
10. Razmatranje i usvajanje Izvještaja o radu Komisije za utvrđivanje prometne vrijednosti nepokretnosti i prava za 2019. godinu,
11. Razmatranje i usvajanje Informacije o sigurnosti na području općine Doboj Istok za 2019. godinu,
12. Razmatranje i usvajanje Informacije o pripremnim aktivnostima za proljetnu sjetvu 2020. godine,
13. Razmatranje zahtjeva „Telemach“ društvo za pružanje usluga iz oblasti telekomunikacija d.o.o. Sarajevo za davanje saglasnosti sa korištenje stubova javne rasvjete u Klokočnici,
14. Razmatranje plana upisa učenika u prvi razred srednje škole u školskoj 2020/2021. godini u JU Mješovita srednja škola Doboj Istok.

REALIZACIJA DNEVNOG REDA

Ad. 1. Razmatranje i usvajanje prijedloga Odluke o izmjeni i dopuni Odluke o službenom glasilu općine Doboj Istok.

Dr. Ferid Konjić, predsjedavajući Općinskog vijeća: „ Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Pozdravljam i selamim prisutne nikad u većem broju u posljednje vrijeme. Što se tiče prve tačke dnevnog reda, odnosno Odluke o izmjenama i dopunama Odluke o službenom glasilu općine Doboj Istok taj prijedlog je bio moj na Kolegiju. Predsjedavajući i Kolegij su usvojili taj prijedlog i rekli da ide kao tačka dnevnog reda i ovog puta im zahvaljujem. Međutim vidimo da sam ja imala prijedlog za član 3. da službene novine idu u elektronskoj formi, odnosno obliku i da se dostavljaju određenim korisnicima, jer smatram da je već vrijeme da prelazimo na te elektronske stvari zbog uštede određenih materijalnih sredstava. U ovom slučaju neku ekološku konotaciju ima taj moj prijedlog. Međutim vidimo da je sekretar kada je čitao odluku još uvrstio izmjenu u članu 1. i članu 2. Član 1. ja se u potpunosti slažem, a čak nisam znala da ne postoji u onoj staroj odluci da se u Službenim novinama općine Doboj Istok objavljuju odluke i drugi opći i pojedinačni akti koje donosi Općinsko vijeće Doboj Istok i Općinski načelnik, a ovdje je dodato javne ustanove i javna preduzeća. Ja mislim da ćemo se držati toga. Znači potrebno je da u službenim novinama imamo određene akte koje donose ustanove i preduzeća. Vi ste izmijenili član 2. jer smo prije imali sekretara Općinskog vijeća što je stajalo u toj odluci, a ovdje stoji osoba koja obavlja poslove sekretara. Smatram da je ova odluka za sada jako jako dobro urađena i da ju trebamo svi u cjelosti prihvatiti i biti za nju.“

Dr. Ferid Konjić, predsjedavajući Općinskog vijeća: „ Ima li još diskutacija? Ne vidim prijavljenih i dajem na izjašnjavanje. Ko je za?“

Glasanje: ZA – 16, PROTIV – 0, UZDRŽANIH – 0.

Ad.2. Razmatranje i usvajanje prijedloga Odluke o visini prosječne konačne građevinske cijene 1 m² korisne površine građevinskog objekta na području općine Doboj Istok za 2020. godinu

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. To je tačka koju svake godine moramo usvojiti, a cijena je ista kao što je i do sada bila, tako da dajem na izjašnjavanje. Ko je za ovu Odluku?“

Glasanje: ZA – 16, PROTIV – 0, UZDRŽANIH – 0.

Ad.3. Razmatranje i usvajanje Izvještaja o radu Zajedničkog pravobranilaštva Čelić, Teočak, Sapna i Doboj Istok za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „ Gledajući sjednicu Gradskog vijeća grada Zenica, bila je neka tačka i onda je načelnik rekao kako oni nemaju pravobranioca i kako već izvjesni niz godina imaju potrebu za pravobraniocom, odnosno da koriste neke usluge koje njih jako puno koštaju, pa da prije svega kažem da imamo sreću kao općina bez obzira što je to i Čelić i Sapna. Zaista imamo sreću što imamo osobu koja kvalitetno može obavljati poslove u svom opusu. Što se tiče Izvještaja vidimo da su, kada je u pitanju rad pravobranilaštva po konkretnim sudskim predmetima za općinu Doboj Istok, uglavnom stari predmeti. Ja sam isčitala i nisam primijetila ni jedan novi spor, neki novi predmet. Ovdje imamo predmeta, čini mi se, od prije četiri godine, upravni sporovi i sve je isto kao i prije, mada su se neke stvari riješile. Postavila bih pitanje, a i to je u opusu, jer kažete da dajete mišljenja i u toku 2019. godine pravobranilaštvo je dalo, kako vidim dva mišljenja. Da li se nije imalo vremena ili nije bilo potrebe za davanjem mišljenja budući da znamo kada pravobranilac daje mišljenje, kada su u pitanju prelasci određenih suma novaca. Samo da vidimo da li nije bilo potrebe ili možda niste uspjeli realizirati.“

Dr. Ferid Konjić, predsjedavajući Općinskog vijeća: „ Ima li još diskutacija? Ne vidim prijavljenih. Molim pravobranioca da se izjasni.“

Lejla Hasanović, općinski pravobranilac: „ Prije svega sve vas srdačno pozdravljam i selamim. Što se tiče vašeg pitanja pravobranilaštvo je dalo dva mišljenja u pogledu prometa imovine. Radilo se o mišljenju, a bio je nacrt ugovora o kupoprodaji i tu smo stavili neke zamjerke u smislu da nije mogao biti predmet ugovora javno dobro, mada je Vijeće prije toga donijelo odluku o skidanju statusa javnog dobra. Mi smo proveli tu proceduru, ali je nastala neka greška prilikom knjiženja. Kada je notar dostavio ugovor tada sam uočila te probleme i tražila sam da se to ispravi. To se isto odnosi i na zamjenu nekretnina. Svi drugi zahtjevi i mišljenja koji se nisu ticali prometa imovine nisam ih posebno obrazlagala ni navodila. Ranije je bilo mišljenje na ugovore koji se tiču provedenog postupka javne nabavke o izvođenju radova, o nabavci roba. Ranije je pravobranilaštvo davalo mišljenja i na te stvari. Međutim izmjenom zakona je prestala ta obaveza tako da su pravobranioci od toga oslobođeni, a mi nismo imali više predmeta što se tiče samog prometa, a to je ugovor o zamjeni i ugovor o kupoprodaji. Ono što je najviše sporno u svim općinama, pa i ovdje, to je zaštita javnih dobara, uređenje međa između privatne imovine i javnog dobra. Mi se tu zaista susrećemo sa velikim problemom i na području općine Doboj Istok obzirom da su katastarskim planom malo pomjereni. Pokušavali smo putem suda da uređujemo među prema stanju kako ljudi koriste, jer neke stvari ne možete izmijeniti ako su takve bile 40 – 50 godina. Međutim sud se oglasio nenadležnim i na nama je ostao taj teret uređenja, a to je jako složem postupak. Problem je što nije donesen poseban propis koji je još 2015. godine u Zakonu o stvarnim pravima definisan da će se donijeti. Znači mi jednostavno nemamo propisa po kojem postupamo i moramo jednostavno da improvizujemo i da nalazimo neke načine s tim da organ uprave nema konkretnu nadležnost. Ranije je to bio Zakon o uzurpacijama gdje neko na neki način prisvoji ili ugrozi državnu imovinu i javno dobro, što znači postojao je postupak kako se rješava, a mi sada trenutno nemamo takvog postupka. Onda mi tu improvizujemo, ja podnosim krivične prijave za uzimanje nekretnine od opšteg značaja. Naravno organi krivičnog gonjenja su tu jako zauzeti drugim bitnijim stvarima da bi oni te stvari rješavali. Mi se nadamo, ne samo ovo pravobranilaštvo, nego i pravobranilaštvo Grada Tuzle, kao i sva ostala, i pisali su inicijative za donošenje tih propisa, međutim to još uvijek nije riješeno.“

Dr. Ferid Konjić, predsjedavajući Općinskog vijeća: „Ima li još diskutiranih? Ne vidim prijavljenih i dajem na izjašnjavaње. Ko je za?“

Glasanje: ZA – 16, PROTIV – 0, UZDRŽANIH – 0.

Ad.4. Razmatranje i usvajanje Izvještaja o radu komunalnog inspektora za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Fajik Muratović, vijećnik SDP: „Pozdrav svima. Vidim da nije interesantna ova tema, a ona je jako bitna. Ako uzmemo ovdje kako piše da se u Doboju Istoku najviše sredstava izdvaja za javnu rasvjetu, a znamo otprilike kako ta javna rasvjeta funkcioniše i kako se plaća. Usmjere se sredstva preko mjesnih zajednica i oni to navodno odrade. Ako uzmemo u obzir da jedna trećina sijalica ne radi i da se često puta zna desiti da se releji ne isključe i da čitav dan gori svjetlo, a tu se može napraviti daleko više ušteda. Mi smo najmanja općina u Kantonu, a najviše sredstava izdvajamo za javnu rasvjetu. Vidim da imaju planovi za poboljšanje i to prihvatam, ali ne prihvatam da mi kao općina najviše sredstava izdvajamo za javnu rasvjetu. Ova uključanja i isključenja treba poboljšati, a normalno i te sijalice. Ovdje imamo izvještaj inspektora da je većina stubova nageta i postavlja se pitanje, pošto ima tačka dnevnog reda da se na te stubove zakače još nekakvi kablovi od kablovskih operatera, koliko će to još pogoršati situaciju na terenu. Ne znam ko je zadužen za to da li izvođač radova koji je radio da te stubove popravi ili Općinsko vijeće mora naći način. Ako to već mora onda ja predlažem da se odmah krene sa uštedama na broju sati rasvjete, da se neke smanjuju i isključuju, da se uštede sredstava da se to može popraviti. Ovdje gledam odvoz smeća je u blagom porastu u poboljšanju, ali to nije zadovoljavajuće. Općina planira svake budžetske godine sredstva za uklanjanje tih deponija. Ja mislim da bi ta sredstva, a znam da ima problema na terenu, trebalo usmjeriti na odvoz krutog otpada zato što taj kruti otpad nama pravi problem i istresa se na svim lokacijama koja su dozvoljena i koja nisu dozvoljena. Ako uzmemo uklanjanje snijega i leda, ove godine toga nije bilo i ne planira se pranje površina. Ta sredstva džaba stoje na računu, to je njima dobro došlo, jer trebaju im, ali bi bar mogli isplanirati pranje površina, jer se prilikom oranja, odvoza đubreta i stajnjaka površine isprljaju. Mislim da bi bilo pametno da se sugeriše da izvrše pranje bar ovih površina radi zaraza i svega ostalog. Odvod otpadnih voda nije spomenut nikako, a svi smo svjedoci da pored javnih ustanova i osnovnih škola teku fekalije bukvalno. Ljudi čiste svoje septičke jame i istresaju na površinama kod osnovnih škola i kod javnih ustanova. Vidim da je ovo dobro urađeno, pregledno je i može se dosta toga pročitati iz ovoga, ali da se i na to malo skrene pažnja ako je to moguće. Imao sam još nekih sitnica, ali ne bih opterećivao Vijeće sa tim, jer se to može sve u hodu riješiti.“

Emira Karić, predsjednica kluba vijećnika SDP: „Vi znate da sam ja uvijek imala primjedbe na ovaj izvještaj, ne zato što imam protiv nekog nešto, nego zato što smatram da je on nedovoljno sadržajan. Ovaj izvještaj na pet stranica po meni nije dovoljno sadržajan zato što je izvještaj o radu komunalnog inspektora jedna krucijalna stvar na općini Doboju Istok. Otprilike znamo koje su nam problematike, ali se nedovoljno ovdje dotičemo tih problematika. On jest u nekako drugačijem duhu urađen i kada sam pročitala dole Abdulah vidim da mi to ne liči na prošlogodišnje izvještaje. Zaista vam moram skrenuti pažnju na nekoliko stvari. Znači kada navodite ovdje u periodu 01.01.-31.12. komunalni inspektor i komunalni redar po službenoj dužnosti na inicijativu građana uradio je 37 rješenja o otklanjanju nedostataka. Ja smatram da nas trebate upoznavati sa tom vrstom nedostataka. Mislim da to nije problem, jer vi vjerovatno po realizaciji tih nedostataka evidentirate šta ste uradili. Ako je moguće u budućnosti da i nas izvjestite da vidimo da li i mi možemo sudjelovati u poboljšanju realizacije tih nedostataka. Takođe je i ovaj dio po meni zaista važan pored ostalih vrsta posla komunalni inspektor je obavljao i druge poslove, pa stalni nadzor nad čišćenjem javnih vodenih dobara. Ja bih neki kratak rezime šta se radilo i u kakvom su stanju sada te otpadne vode itd. Nadzor nad projektima koji se finansiraju od strane UNDP, meni ovo ništa ne znači, jer ne znam ni šta je UNDP finansirao i o čemu se radi. Takođe ste rekli da je saradnja sa nevladinim sektorom, učesće u javnim pozivima, spominjete i Asocijaciju „MB LIVE“ Brijesnica i Forum solidarnosti. Jednostavno da nas malo više upoznate, jer nas kao vijećnike ljudi pitaju i najžalosnije je kada ja kažem da ću se o tome informisati. Njima je to nedovoljno u smislu zar nisi već informisana o tim stvarima, pa ako je moguće malo šire. Ja ću se osvrnuti na svoju branšu nama iz Ministarstva i Pedagoškog zavoda dolaze zaista nebitne stvari koje mi moramo u velikom obimu opisati i posvetiti se tome, a ovdje imamo nešto jako jako važno što nije, po meni, dovoljno sadržano.“

Sajib Mešić, zamjenik predsjedavajućeg Općinskog vijeća: „ Poštovani predsjedavajući, uvažene kolege i kolegice vijećnici, načelnice sa saradnicima, prisutni gosti, predstavnici medija. Iz ovog izvještaja mogli smo vidjeti puno aktivnosti koje je komunalni inspektor imao. Međutim ja sam našao za shodno i osjetio potrebu da pohvalim jedan dio ovog izvještaja u kome se kaže da su na sve grantove u saradnji sa komunalnim inspektorom učestvovali Asocijacija „MB LIVE“ Brijesnica Mala i Forum solidarnosti „Emmaus“. Posebno ova Asocijacija „MB LIVE“, a to je jedna nevladina organizacija koja je vrlo aktivna na našem području i mislim da su zaslužili i zavrijedili našu pažnju. To je grupa momaka i djevojaka koji puno rade na stvarima koje su bitne za lokalnu zajednicu, počev od komunalnih projekata na koje su aplicirali zajedno sa službom oko prikupljanja otpada, projekata vezanih za bezbjednost saobraćaja sa našom Policijskom upravom itd. Mislim da je to kroz medije bilo zabilježeno, a koliko je to ko pratio, a koliko nije, mislim da su svakako zaslužili pažnju i pohvalu momci i djevojke koje se bave tim stvarima. Svakako su zaslužili pohvalu ljudi koji su to naveli jednostavno kao činjenicu da je to tako i oni nisu ništa naveli što nije tačno. Svakako je naš bivši inspektor, gospodin Bećirović, kao i ovaj potpisnik akta, naš Hrnjičić Abdulah, svakako zavrijedio pažnju što je naveo da je to jednostavno tako. Ja vjerujem da će i u budućnosti nastaviti saradnju i da je to pohvalno i dobro za našu zajednicu.“

Kemal Bratić, općinski načelnik: „ Ja vas sve selamim i želim uspješan rad. Kada govorimo o komunalnom inspektoru svi znamo ili se pravimo da ne znamo da mi u stvari nemamo radno mjesto striktno komunalni inspektor. Ovo je izvještaj prethodnog vršioca dužnosti komunalnog inspektora, jer ga moramo imati u slučaju spora, u slučaju rješavanja određenih sporova na terenu. Najveći dio posla koji radi komunalni inspektor je spor između dvije stranke na terenu i zato ga mi moramo imati. Nažalost nismo bili u mogućnosti u prethodnim godinama da imamo striktno komunalnog inspektora, a treba da imamo i građevinskog. Evo da vam kažem jednu radosnu vijest da smo u ovu godinu ušli sa suficitom i da ćemo vjerovatno u narednom periodu poraditi na tome da primimo i komunalnog inspektora i da primimo građevinskog inspektora. Nisam izašao da bih vam to rekao nego želim da vam skrenem pažnju na par stvari. Sve ovo što ste vi govorili i uvaženi vijećniče Muratoviću i poštovana vijećnice otprilike bih ja sveo, a možda će me građani krivo shvatiti, da je 70 % do naše svijesti. Zašto ovo govorim? Mi smo ovdje imali neke od prisutnih koji nisu plaćali odvoz smeća, pa smo ih na neki način prozvali pa su počeli da plaćaju smeće. Odvodnja otpadnih voda - onaj ko će to napraviti ne može njemu komunalni inspektor osim da ga pošalje na sud, samo sudski proces, jer ne možemo mi na licu mjesta uz asistenciju policije reći okreni ti tu cijev tamo, jer postoji procedura koja se mora poštovati. Ne bih se ja sa vama složio da neko u mjesnoj zajednici ofrlje plaća struju, jer svaka mjesna zajednica ima svoje brojilo. Elektrodistribucija ispostavlja račun u mjesne zajednice, a Općina Doboj Istok plaća električnu energiju koja se potroši za javnu rasvjetu. Ne znam da li sreća ili je nesreća što mi imamo ovoliko brojnih mjesta, odnosno sijaličnih mjesta, čini mi se oko 1500 sijaličnih mjesta. Kada se uzme prostor koji mi pokrivamo zbilja smo općina koja ima najviše sijaličnih mjesta i sve to plaća Općina Doboj Istok. Ja smatram da je sreća, jer bilo je tamo nekih nemilih događaja u prošlosti, pa smo mi to malo pojačali. Vjerujte mi da im više znači to sijalično mjesto koje radi ili ne radi i više zovu za to i mene i moje saradnike, nego za bilo šta drugo. Naravno ja sam odmah poslije nove godine dao nalog da se sva sijalična mjesta puste u pogon. Zašto smo uradili, pa smo ugasili određen broj sijaličnih mjesta? Vi znate da smo imali u budžetu određene probleme finansijske, pa smo gledali da od vaših paušala, pa od plaćanja nekih komisija itd. Znači sve smo pokušavali da uštedimo dio sredstava da bi stabilizovali budžet i da ne bi bili nikome dužni. Sada je došao taj trenutak i ja sam procijenio da vratimo sva sijalična mjesta i ona se iz dana u dan šire. Svaki dan je maltene neki zahtjev za proširenje ulične javne rasvjete. Ono što je dobro i što je lijepo nekada nas neko poredi sa nekim općinama koje su daleko ispred nas i koje daleko veću tradiciju imaju, a uzet ću prvu susjednu općinu Gračanica. Ja sam neku večer išao u Lukavicu Rijeku i prolazio sam kroz tamu i onda dolazimo na područje naše Općine i Lukavica Rijeka je kao Beverli Hills obasjana sa svih strana i maltene svaka uličica je osvjetljena i to je dobro. Naši građani daju sredstava i hajmo im vratiti makar na taj način. Ovih dana pokrećemo proceduru zamjene određenog broja sijaličnih mjesta sa LED sijalicama i u narednom periodu će nam to biti cilj, ne samo da bi manje plaćali nego da bi bilo i manje štetnih materija, jer znamo da ove štete za naše građane. Tako i ja sam to do sada rekao možda 150 puta sa ove govornice, moramo uvijek imati na umu da mi sve pravimo sa ledine, pa tako i odvoz smeća, pa tako i odvod otpadnih voda. Nismo mi sada došli, ja kao općinski načelnik, a vi kao Općinsko vijeće da nam je sve tamo, kao u Tuzli poravnato, da imamo dugogodišnju tradiciju grada - općine i da mi upravljamo i raspoređujemo. Znači mi još pravimo sistem i veoma je teško kada ljude trebamo uvesti u

sistem. Počinjemo od nas, veoma je teško kada se radi o nekoj izmjeni, pa tako i u ovoj oblasti zaštite životne sredine. Ja smatram da je ona najznačajnija. Imali smo ovih dana unazad par mjeseci probleme sa zagađenim zrakom u Tuzli, u Živinicama, u Lukavcu i ja sam se našao sa ministrom za zaštitu okoliša i evo neka ljudi dođu da žive ovdje, a neka rade u Tuzli. Sve je to cijena koja se na neki način mora platiti. Nama je na selu ljepše, jer imamo čistiji zrak, ali i Tuzla kao grad ima određene benefite kada su u pitanju neke druge stvari. Ja smatram da će u narednom periodu ovdje biti puno posla i da ćemo morati angažovati stručnjaka samo iz te oblasti da pojačamo tu oblast. Naravno ne slažem se da nema napretka, jer mi svake godine povećavamo broj korisnika odvoza smeća i smanjujemo broj divljih deponija. Nekada je bilo, prije nego što sam ja bio načelnik, znate koliko smo imali divljih deponija, pa smanjujemo malo po malo, pa slikaju ljudi i traže da vide ko je bacio, ali opet se vraća. Najbitnija stvar je da je do 70 % do naše svijesti.“

Emira Karić, predsjednica kluba vijećnika SDP: „ Načelniče, baš ste spomenuli ono o čemu sam htjela replicirati a to je svijest ili savjest građana i slažem se u tom domenu, ali šta ćemo sa nesavjesnim građanima. Tu itekako imam primjedbu na rad komunalnog redara i komunalnog inspektora. Već izvjesni niz godina određene otpadne vode ili fekalne vode završavaju na putevima i cestama općine Doboj Istok. Upozoravala sam prije, čini mi se, tri - četiri godine i sam v.d. komunalni inspektor i komunalni redar često prolaze preko takvih cesta i puteva, međutim napretka nema. Ja samo tražim da li ste u izvještaju mogli napisati par rečenica da su ljudi upozoreni, kako su upozoreni itd. Svakodnevno izlijevanje fekalnih voda na cestu, a da je čovjek samo jednom ili dva puta opomenut, za mene to nije dovoljan rad. Ako kažemo v.d. inspektore, dobro slažem se v.d. je, ali komunalni redar ima 8 časovno radno vrijeme. Takve stvari u našoj maloj općini treba itekako brzo i efektivno rješavati.“

Kemal Bratić, općinski načelnik: „ Ja se bojim da se mi ne razumijemo ili nećemo da se razumijemo. Upravo ovo što sam rekao, mi pravimo sistem. Pravimo i projekte i objekte koji će koristiti za odvodnju tih otpadnih voda. U ovoj sedmici, u utorak ili srijedu, dobio sam obavijest od Češke razvojne agencije i Slovenačke strane da je odobren projekat za izgradnju prečišćaća u MZ Klokotnica u vrijednosti od 2 miliona eura koji ćemo, ako Bog da, realizovati u narednom periodu. Samim tim ćemo omogućiti građanima jedne mjesne zajednice koji će biti primorani da se prikopčaju, jer smo im obezbijedili uslove i da sredstvima od te takse, razgovarali smo o tome nekoliko puta, širimo kanalizacionu mrežu u drugim mjesnim zajednicama. Kako mi čovjeka da natjeramo da on nešto radi kada nema, jer ne može ići voda uzbrdo, ni otpadna, niti bilo koja druga. Znači moramo obezbijediti uslove da bi ljudi mogli da se prikopčaju. Naravno ja vas razumijem i znam o čemu pričate, a to je opet do naše svijesti, jer ljudi nisu uradili septičke jame sa komorama i da imaju prečišćaće i da su to uradili bilo bi puno bolje. Vjerujte da i jedan i drugi i komunalni redar i komunalni inspektor daju sve od sebe na terenu, pa čak dajemo i ove kaznene odredbe, krivične prijave, da ljudi plaćaju određene kazne da bi unaprijedili tu oblast. Ponavljam mi smo dužni da obezbijedimo infrastrukturu za odvod kako otpadnih tako i oborinskih voda. Naravno da je jedan od preduslova da imamo prečišćaće, jer imamo rijeku u koju bi voda dalje išla.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih. Nama vjerovatno neće nikada sam komunalni inspektor sve riješiti. Ja ću pročitati samo jednu stavku iz ove tabele gdje je prikaz korisnika odvoza otpada. Iz priložene tabele vidljivo je da je najmanje uključenost domaćinstava u odvozu smeća u Maloj Brijesnici, a najveća u MZ Stanić Rijeka. Ovo se već godinama provlači i ja pitam šta mi svi radimo u svojim mjesnim zajednicama da to popravimo. Odvoz smeća se može povećati i to je sigurno do nas. Možemo mi ići na taj način, jer direktno utičemo i na Čisto, pa će morati pare ići na druge stvari. Smeće ako se ne odveze preko preduzeća Čisto, odvest će se na deponiju i odmah zagađujemo sredinu i svi radimo protiv sebe. Hajmo se malo okrenuti sebi i vidjeti šta mi možemo uraditi, a ne samo kritikovati. Kritika treba, ali da vidimo šta mi možemo uraditi. Ovo nije samo u ovom izvještaju, ovo se stalno ovako prati.“

Emira Karić, predsjednica kluba vijećnika SDP: „ Sada ću malo proširiti diskusiju i priču. Postoje odluke koje se nisu realizirale i postavljeno je vijećničko pitanje na koje mi nije odgovoreno koje su to odluke i zašto se nisu realizirale. Reći ću zašto. Takođe je komunalni inspektor na nekoliko sjednica rekao da ima mehanizme. Mehanizmi su bili i mi smo tu odluku donijeli i evo može 10 minuta pauze da tu odluku nađemo. Ja ću parafrazirati i reći kako je spominjao da neće moći registrirati svoje kućne ljubimce. Zašto bih ja išla na teren, naravno mogu sugerisati i mogu na nekim diskusijama i nekim sastancima o

tome pričati, ali čini mi se da smo donijeli taj neki mehanizam. Ja vas pitam zašto on nije realiziran da će ići kroz nemogućnost registracije naših vozila.“

Dr. Ferid Konjić, predsjedavajući Općinskog vijeća: „Možemo mi diskutovati šta god hoćemo. Ovo su stvari životne i može se obrazložiti. Znači nije ekonomski razlog, a da li je to radnja protiv nas i protiv komunalnog preduzeća i moramo jednom otvoriti oči i gledati na osnovu ovih činjenica. Mi smo mala sredina i mala općina i ovo je naše javno preduzeće, mi ga možemo urediti i mi ga možemo pomoći, a možemo i odmoći. Na ovaj način mislim da mi odmažemo javno preduzeće i stvaramo sebi deponije, prljamo sebe, a kritikujemo druge. Do kada ćemo mi to tako raditi, a da ne kažemo u lice, hajmo očistiti i neće biti deponija, jer bit će nam čišće i bit ćemo bolji.“

Kemal Bratić, općinski načelnik: „Ja ne znam da li je i jedan inspektor to rekao, a čini mi se da sam bio na svim vijećima. To nema veze sa vezom i ako je on rekao on nema veze sa vezom i ko god je to rekao. Ponavljam najbitnija stvar je da mi svi imamo određene autoritete u svojim mjesnim zajednicama. Ono što je bitno da ljudi počinju shvatati da je to naša mjesna zajednica, da je to naša općina, da je to naš put, da je to naša sijalica, da je to naša škola i na tome trebamo raditi. Zato sam ja rekao da je dosta do savjesti svih nas. Gledamo svi da nam je dvorište fantastično, jer će neko reći nije mu uredno dvorište ili njiva ili bilo šta drugo, a čim izađemo na put ponašamo se drugačije, a i ovo je naše. Znači naš je i put, naša je i ulica, naša je i sala i škola. O tome se radi i na tome mi moramo raditi, pa možda čak i neke radionice. Vi ste učestvovali na tim radionicama i znate kako to treba da izgleda i kako da se radi. Evo da podržimo takve radionice iz budžeta i da na tome radimo, jer će se čovjek zapitati, pa će ga biti stid, jer ćemo ga možda pozvati na neku od tih radionica. Ne možemo mi sada ovdje prozivati nekoga, ali možemo na savjetu mjesne zajednice i na tome moramo raditi. Tu ćemo napraviti više efekta nego da imamo četiri komunalna inspektora. Znači na taj način buditi svijest kod ljudi da volimo svoju mjesnu zajednicu i da volimo svoju općinu, jer sve je ovo naše zajedničko, a ne čim izađemo iz svog dvorišta ponašamo se kao da je to tamo i draža nam je neka druga općina nego naša ili neke druge stvari.“

Faruk Avdagić, komandir Policijske stanice Doboj Istok: „Uvaženi predsjedavajući, uvaženi općinski načelnici, vijećnici. Ja ne mogu prešutiti informaciju da smo mi u toku 2019. godine u saradnji sa komunalnim redarom imali više sastanaka i više intervencija u cilju nekih problema koji su se ticali nelegalnih deponija na području općine. Tako da smo zajedničkim djelovanjem pokušali da dođemo do informacija o vozilima i licima koja vrše bacanje i odvoz smeća na nelegalne deponije. Mi smo uspjeli locirati i utvrditi koja su to lica, a dalje mjere je poduzimao redar, odnosno komunalni inspektor. Ne mogu da prešutim da se nije radilo po ovom pitanju, jer se radilo u 2019. godini po pitanju ovih divljih deponija.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavanje. Ko je za Izvještaj?“

Glasanje: ZA – 12, PROTIV – 0, UZDRŽANIH – 4.

Ad.5. Razmatranje i usvajanje Izvještaja o radu Savjeta mjesne zajednica Klokočnica za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Fajik Muratović, vijećnik SDP: „Inače nemam običaj izlaziti na replike, ko se slaže sa mojim mišljenjem slaže, ko ne slaže ima pravo i na to. Pročitao sam sve izvještaje mjesnih zajednica i mogu slobodno reći malo me i stid što su takvi kakvi jesu. Imaju tri mjesne zajednice, ne bih imenovao, koje su samo uslikale slike, a jedna mjesna zajednica ni jednog broja, ni da su dobili pare, ni da su potrošili i o njima ne bih ni komentarisao. Ovi su kao općina zakukuljili izvještaj mjesne zajednice i totalno je nerazumljiv. Tačka dnevnog reda je Mjesna zajednica Klokočnica i tu ću se malo više zadržati. Što se tiče ovog izvještaja iz njega se dosta toga vidi. Vidi se da je Savjet Mjesne zajednice dosta dobro radio i da je ostvario saradnju sa nevladinom organizacijom, sportskim klubovima, javnim ustanovama i sve ostalo. Vidim iz izlaganja načelnika da se i to popravilo, jer nisu bili ostvarili kontakte sa međunarodnim zajednicama i nisu aplicirali na projekte, a vidim sada da i to ima. Što se tiče prihoda i rashoda, ne slaže se, jer je mala razlika i veći su rashodi od prihoda i može biti nešto oko toga problematično. Ako se izbije

javna rasvjeta koja se plaća preko mjesne zajednice i troškovi koji su redovni, to je nekih 80.000 KM, tako da nisu tako ogromna sredstva, jer kada prvi puta pogledaš to su sredstva preko 100.000 KM i čovjek se zapita gdje su pare. Kada se izbije to sve to i nisu neka sredstva sa kojim se može raspolagati. Postavio bih još jedno pitanje pošto znam da u svim mjesnim zajednicama kada dođe do promjene sastava dođe na Općinsko vijeće da se imenuje novi član. U MZ Klokočnica koliko se sjećamo Kasim je umro i nikad nije bilo popunjeno, pa bih pitao zašto nije, ako ko može odgovoriti.“

Senada Džanić, predsjednica kluba vijećnika SBB – BPS: „ Uvaženi predsjedavajući, zamjenice, pomoćnici općinskog načelnika, kolegice i kolege vijećnici, gosti, predstavnici medija selamim vas i pozdravljam. Svakako bi čestitala na izvještaju o radu Mjesnoj zajednici Klokočnica i zahvalila se na saradnji kao direktorica škole. Skrenula bih pažnju, jer ovdje stoji ugradnja lifta u Osnovnoj školi „Klokočnica“, odnosno donacija Osnovnoj školi, pa da ne bi zbunili građane radi se o projektima koje je vodila škola „Klokočnica“ i trebalo nam je samo pravno lica preko koga bi izvršili uplatu. Bila je znači saradnja sa nevladinom organizacijom World vision, građanima, privrednicima, učesnice uposlenika itd. Znači samo da napomenem da smo samo koristili račun Mjesne zajednice Klokočnica.“

Emira Karić, predsjednica kluba vijećnika SDP: „Ovo što ću sada diskutovati vezano je za sve izvještaje mjesnih zajednica. Moram reći da je trebalo ići kao vijećnička inicijativa, ali ja sam poslušala svog klupskog kolegu Fajku koji je rekao da to predložim službi. Ja ću krenuti od toga da smatram da bi trebao biti jedan određen obrazac – urnek načina pisanja izvještaja o radu savjeta mjesnih zajednica kako bi oni na neki način bili jednoobrazni i kako bi mi mogli vršiti i paralele i uviđanja u određene stvari. Sve će biti u zapisniku, pa ukoliko želite ovaj prijedlog uzeti kao vaš prijedlog slobodno možete. Dakle jedan obrazac treba da sačinjava sljedeće: broj članova i imena članova savjeta mjesne zajednice, broj sjednica, prisustvo na sjednicama, realizacija plana aktivnosti, detaljan finansijski izvještaj, saradnja sa općinom i javnim preduzećima i javnim ustanovama, saradnja sa građanima, saradnja sa nevladinim sektorom, sportske i kulturne manifestacije i na kraju plan aktivnosti za narednu godinu. Kada bi poslali sekretarima, a neki su i plaćeni za taj posao, a neki rade volonterski ili za neki minimalni dohodak mislim da bi i njima bilo jasnije. Kasnije ću se osvrnuti na Mjesnu zajednicu Klokočnica, ali smatram da bi mogli svi na osnovu ovog načina obrasca ne lutati, jer u svakom izvještaju kao da fali, a ovaj drugi je to obrazložio dobro, a u ovoj mjesnoj zajednici ovoga nema. Moj prijedlog bit će u zapisniku na narednoj sjednici kada budu bili izvještaji mjesnih zajednica da pošaljete ovakav obrazac ili urnek. Što se tiče Mjesne zajednice Klokočnica, da se malo našalim, to je jedno malo preduzeće u odnosu na ostale mjesne zajednice. Svaka čast na tome. Mislim da se finansijski izvještaj razlikuje, jer došlo je do manjka ako uzmemo 10.000 koje je samo prošlo kroz račun mjesne zajednice. To je vjerovatno NLB Banka koja je izašla, ta kirija, da li je još smanjenje nekih kirija bilo, to ne znam. Uglavnom imate jako dobra i solidna sredstva i jako veliki opus aktivnosti i zato kažem čestitam Mjesnoj zajednici. Iako je sročeno kratko vidi se da ste saradivali sa građanima, da su i oni voljni učestvovati u nekim projektima i da ste saradivali sa sportskim klubovima. Puno puno saradnje, naravno vi imate ta finansijska sredstva za razliku od Mjesne zajednice Brijesnica koja ne da nije preduzeće, nego je to čist volonterski rad, ljudi uopšte nemaju sredstava. Vi pokazujete primjer kako jedna mjesna zajednica i šta je cilj jedne mjesne zajednice. Ovdje bi uvrstila ono što je spominjano na prethodnoj tački dnevnog reda i smatram da bi savjeti trebali jedan sastanak, jednu tribinu, jednu panel diskusiju kada je u pitanju priključivanje na smeće i to u skoroj budućnosti. Ja se prijavljujem kao vijećnik ukoliko želite sa mnom saradivati, kao i sve ostale mjesne zajednice. Ja bih se primila takve neke aktivnosti i bila bih pokretač tih aktivnosti u bilo kojoj mjesnoj zajednici. Mislim da to nije problem i samo bi bio problem obavješćavanje građana i jako dobra prisutnost i smatram da bi se stvari dobro pokrenule naprijed.“

Dr. Ferid Konjić, predsjedavajući Općinskog vijeća: „Ima li još diskutanata? Ima li potrebe predstavnik Mjesne zajednice? Nema. Ako nema više, dajem na izjašnjenje. Ko je za ovaj izvještaj?“
Glasanje: ZA – 16, PROTIV – 0, UZDRŽANIH – 0.

Ad.6. Razmatranje i usvajanje Izvještaja o radu Savjeta mjesne zajednica Brijesnica Velika za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Kemal Skopljak, vijećnik BPS: „ Pošto prvi puta izlazim pozdravljam sve prisutne. Kroz ovaj izvještaj Mjesne zajednice Brijesnica Velika je vrlo lako proći, jer nema ništa konkretno, nema nikakvih cifri, jako oskudan izvještaj. Međutim, želim da vam pročitam samo jednu rečenicu koju ću ja komentarisati poslije. Sve manje izdvajanja sredstava iz budžeta općine za potrebe mjesnih zajednica dovele su mjesne zajednice ispod nivoa pojedinih udruženja građana i time se onemogućava da mjesne zajednice ostvare bolje rezultate na uređenju životnog prostora svojih građana. Svi ste svjedoci da sam prošle godine za ovom govornicom podnio jednu inicijativu iz pozicije koju je jedino podržao predsjedavajući i zahvaljujem mu se ovom prilikom, da se utiče na iznalaženje sredstava za mjesne zajednice. Inicijativa je bila da pokušamo prostorije u kojima radi PIO da prebacimo mjesnoj zajednici da iznađu prostor i da se te prostorije koriste za PIO. Tada sam obavio razgovore sa nekim koji su radili u mjesnoj zajednici i oni su rekli da ima mogućnost. Naime radi se o velikim sredstvima, jer za ovako malu mjesnu zajednicu 10 – 12.000 je puno. Tada sam dobio odgovor da mi kao Vijeće ne možemo uticati na to, nego da se to prebaci mjesnoj zajednici. Evo prijedlog mjesnoj zajednici, dajte napravite neki tim i nađite prostorije, jer imamo dovoljno prostora slobodnog. Uputite zahtjev menadžmentu PIO da dobijete tu službu, a time ćete dobiti i više sredstava. Ovo vam je jedan od prijedloga. Druga stvar ni mi ne možemo da ne reagujemo na ove stvari, a pogotovo na ovakve rečenice. Moramo više i mi obratiti pažnje i pomoći tim ljudima, a ovo je prilika da pomognemo Mjesnoj zajednici Brijesnica Velika.“

Emira Karić, predsjednica kluba vijećnika SDP: „ Da i ja bih pomenula tu rečenicu gdje se kaže da sve manje izdvajanja sredstava iz budžeta općine za potrebe mjesnih zajednica dovele su mjesne zajednice ispod nivoa pojedinih udruženja građana. Međutim moram reći sekretaru, predsjedniku i članovima Savjeta da nisu čitali izvještaj o radu Mjesne zajednice Lukavica Rijeka gdje se kaže u saradnji sa Općinskim načelnikom provedena je aktivnost oko obilježavanja 25. godišnjice oslobođenja Oblića, uz podršku Općinske službe za civilnu zaštitu i mještana realizirana je aktivnost na sanaciji puta za Varoš, zatim nastavljena je saradnja sa općinskim službama i Općinskim načelnikom. Mi zaista moramo uporedno, ne možemo se samo držati jednog izvještaja savjeta, moramo malo uporedno dotaknuti i ostale izvještaje. Ja se pitam da li je to do savjeta mjesne zajednice Brijesnica Velika ili do Savjeta Mjesne zajednice Lukavica Rijeka. Ovi ovdje imaju jako puno aktivnosti sa Općinskim načelnikom i sa općinskim službama i onda bi bilo dobro da ova rečenica ide u jednini ukoliko se odnosi samo na Mjesnu zajednicu Brijesnica Velika.“

Kemal Bratić, općinski načelnik: „ Ako niste vidjeli ovdje piše sve ove aktivnosti provedene su u dobroj saradnji Općinskim načelnikom i općinskim službama koji su uvijek bili dostupni za saradnju. Vjerovatno niste okrenuli pa pročitali u Izvještaju Savjeta Mjesne zajednice Brijesnica Velika. Ja sam gospodina Skopljaka razumio, ali opet ću se vratiti na onu prethodnu tačku. Moja procjena je da nekada dio sredstava ode možda i bespotrebno za neke stvari koje ne trebaju. Da li treba profesionalno lice da obavlja u Savjetu Mjesne zajednice Brijesnica Velika i da bude čitav dan tamo, ne znam. Hajmo se svi zapitati. Najveći dio sredstava u svim savjetima mjesnih zajednica ide upravo na te stvari. Ja sam vas razumio, gospodine Skopljak, a razumio sam i ovo što ovdje piše da nisu dovoljna sredstva koja mi izdvajamo iz budžeta za rad savjeta mjesnih zajednica, a ne za neke druge stvari. Malo će biti pretjerano reći, ali nema projekta za koji se obratila bilo koja mjesna zajednica, a da je Općina Doboj Istok rekla ne, od Male Brijesnice do Lukavice Rijeke. Tako će biti, ako Bog da, i ubuduće. U svim ovim projektima u Brijesnici Velikoj smo učestvovali sa sredstvima iz budžeta općine, kako uz Klokočnici, tako i u Velikoj Brijesnici, Maloj Brijesnici, Stanić Rijeci i Lukavici Rijeci i tako ćemo, ako Bog da, nastaviti i ubuduće. Da li su ta sredstva za rad savjeta mjesnih zajednica dovoljna, evo ja kažem nisu, ali da li sva sredstva sa kojima raspoložu savjeti mjesnih zajednica idu, da kažem, za prave stvari. Hajmo se i to zapitati. Kada se radi o inicijativi koju ste vi pokrenuli, ja sam rekao da to nije naša nadležnost. Ja sam neki dan imao priliku da razgovaram sa direktorom PIO i oni imaju u planu da traže prostor, ali to nije naša nadležnost, mi se tu ništa ne pitamo. Da li Savjet Mjesne zajednice ima prostor u prizemlju, ne znam. Koliko znam, ja mislim da nema, a svako ko hoće da otvori ili preseli traži prostor u prizemlju. Hoćemo li praviti novi, hajmo i to napraviti ako je to u interesu Savjeta Mjesne zajednice. Savjeti mjesnih zajednica, to ću slobodno reći, neki su malo aktivniji, neki su malo slabiji, neki se sastaju i vijećaju, a neki se nikako ne sastaju. Smatram da je Savjet Mjesne zajednice Velika Brijesnica veoma aktivan bio u prethodnoj godini. Evo gore sjedi čovjek koji je učestvovao u svim akcijama, ako nema predsjednika, ima naš Medle, od nasipanja, krčenja, asfaltiranja, betoniranja itd. Ja znam da su aktivni, znam da su se obraćali i znam da smo učestvovali u tome. Tako da trebamo do kraja pročitati svaki izvještaj, jer i u izvještaju Savjeta

Mjesne zajednice Velika Brijesnica piše da su svi projekti realizovani u saradnji sa Općinom Doboj Istok i nastaviti ćemo tako, ako Bog da.“

Kemal Skopljak, vijećnik BPS: „ Samo replika, načelnika da ispravim, ja nisam rekao da Savjet Mjesne zajednice Brijesnica Velika ne radi, jer oni rade, itekako rade. Ovaj puta ja ih pohvaljujem i pozdravljam. Ne mogu da rade ono što bi inače mogli raditi zbog nedostatka sredstava za koja postoji mogućnost da se iznađu ako se malo više svi potrudimo, a pogotovo oni. Znam da se može iznaći prostor u prizemlju i mogu se uzeti ta sredstva koja bi bila iskorištena, pa neka ih iskoriste za nogometni klub koji grca, bilo bi dobro. Samo sam to mislio.“

Kemal Bratić, općinski načelnik: „Nisam ni ja rekao da ste vi rekli da Savjet Mjesne zajednice ne radi. Ono gdje se mi ne razumijemo, ja smatram da u svakom savjetu mjesne zajednice postoji dio sredstava koji se može usmjeriti za neke druge stvari. Ja predlažem vas za predsjednika komisije, neka Vijeće imenuje komisiju za taj prostor i za preseljavanje PIO i uzmite na sebe to. Ja znam da je određena grupacija ljudi sa Doboj Istoka razgovarala sa direktorom i neka je, to je demokratsko pravo. Moje mišljenje je da svaka ustanova, bez obzira koja, da li zdravstvena ili policija, treba da bude u državnom prostoru. To je moje mišljenje i ja ću to reći gdje god treba da kažem, ali nije naša nadležnost. Ne možemo mi nikoga natjerati i da kažemo slušaj ti moraš se iseliti. Ako je to općinska ustanova onda mi možemo određene zaključke ili naređenja donijeti. Nisam ni u jednom momentu rekao da ste vi rekli da savjet mjesne zajednice ne radi. Ja smatram da Savjet Mjesne zajednice Velika Brijesnica jedan od boljih, neću reći najbolji, ali je jedan od boljih sa svojim aktivistima izmiksano malo starijih malo mladih i oni rade na terenu i pokazuju svojim primjerom šta savjet mjesne zajednice treba da radi. Ne treba savjet mjesne zajednice da se pretvori u nekakav protočni bojler, oni moraju imati inicijative. Znači mi prebacimo sredstva, oni potroše da li na plate, da li na topli obrok, da li ovo, da li ono, a ne treba na to da se svodi. Oni moraju svojim primjerom pokazivati, a na kraju krajeva statut mjesnih zajednica je veoma jasan, zna se šta je njihova nadležnost i zna se šta trebaju raditi. Ne može, kao pojedini savjeti mjesnih zajednica koji su se stavili iznad Općine i Općinskog vijeća, a znate na koga mislim.“

Sajib Mešić, zamjenik predsjedavajućg Općinskog vijeća: „ Tačka dnevnog reda je Savjet Mjesne zajednice Velika Brijesnica i ja jednostavno nisam mogao da odolim i da ne kažem nekoliko stvari. Dugi niz godina ja posmatram rad tih ljudi, bez obzira kakva je struktura i sastav vijeća. Oni imaju jedan specifičan način rada, a specifičan je iz razloga što imaju jednog čovjeka koji se zove Mehmed Mehinović – Medle koji krene u rješavanje problema kada nastane i onda normalno počnu tražiti sredstva od općine, privrednih subjekata itd. To je odličan model, jer se pokazao u praksi kao odličan model i ja kažem svaka čast, čestitam na takvim stvarima i zato sam i rekao da je specifičan. Prema tome nema se tu šta previše reći, onoliko koliko ljudi raspoložu sa mogućnostima što se tiče finansija i pomoći općine itd. oni i rade, ali imaju čovjeka koji možda malo više vuče i nije mu mrsko i nije mu teško pokrenuti akciju bilo koje vrste, a u cilju da se razriješi. U konačnici se i razriješi da li uz pomoć Općine, da li uz pomoć privrednih subjekata, da li apliciranjem prema nekim drugim nivoima, ali uglavnom se riješi. Zato sam i rekao da se oni malo razlikuju po tome i zbog toga sam rekao da su malo specifični, ali je svakako za pohvalu i ovo što je načelnik rekao rade oni itekako i znaju oni kako se radi.“

Emira Karić, predsjednica kluba vijećnika SDP: „Sve je to tačno, sve je to u redu, pokretanje inicijativa, ali bez finansijskih sredstava nema ništa. Ako pogledamo dvije mjesne zajednice, a kažem pohvale za savjete mjesnih zajednica, negdje su paušali izdvojeni, negdje volonterizam i ja se klanjam tom volonterizmu. Kada pogledamo Savjet Klokočnice i Savjet Brijesnice Velike to je kao da gledamo općinu Sarajevo i općinu Kladanj. Zašto je toliko aktivnosti u MZ Klokočnica? Zato što imaju sa čime da raspoložu i ponude građanima da li građani žele prihvatiti i sa svoje strane finansije itd. Osnova su početne finansijska sredstva koja nisu mala u MZ Klokočnica, a uvijek imamo ideja. Ja sama mogu milion nekih ideja da nemetnem bez jedne KM ili više o čemu se ovdje radi jednostavno se ideje ne mogu realizirati. Zato ja shvaćam vijećnika Kemala o čemu priča, a shvatili smo mi svi. Da li je moguće da Općina kod takvih mjesnih zajednica koje nemaju, učini nešto drugo, da li da udupla ta povećanja koja idu prema mjesnim zajednicama. Ja se slažem za sekretara, jer davno sam ovdje iznijela prijedlog da sekretar treba da bude jedan za sve mjesne zajednice, hvala načelniče za logopeda, kao i logoped što sam ja predlagala da ide jedan dan u Klokočnicu i on odraduje posao. Da li je njemu teško, ali on se uklapa u 8 sati, a tako i sekretar i vidjeli bi da bi se itekako uklopio u 8 časovno radno vrijeme ponedjeljkom u Klokočnici,

utorkom u Velikoj Brijesnici itd. Moramo ići prema tome i takođe smatram da trebamo naći modus kod izdvajanja da li udupljavanja sredstava ili na osnovu njihovih inicijativa, prijedloga projekata itd. malo više finansijski potpomoći Mjesnu zajednicu Brijesnica Velika.“

Safet Smajilbašić: vijećnik SBiH: „ Sve vas selamim pošto prvi puta izlazim za govornicu. Prije svega neću se više javljati što se tiče rada mjesnih zajednica samo želim da kažem da nije nikada bilo lako raditi u mjesnoj zajednici. Svi ljudi koji su bili angažovani, koji su sada angažovani i koji se angažuju u mjesnim zajednicama i džematskim odborima znaju koliko treba povući i raditi na svim tim problemima lokalne zajednice, odnosno mjesne zajednice. Ovdje je dobru stvar iznio načelnik i ja tu u potpunosti njega podržavam. Sada ću se dotaći nekih pokazatelja Mjesne zajednice Klokočnica. Samo je prividno da Mjesna zajednica Klokočnica ima prihode 138 – 140.000. Račun Mjesne zajednice je prolazni račun kao što vidite iz prihoda, jer se mahom to finansira javna rasvjeta i najveći dio sredstava su sredstva građana koja se prikupljaju za razno razne akcije u Mjesnoj zajednici Klokočnica. Senada reče da je 10.000 KM samo provozano zato što je moralo ići preko nekog pravnog lica. Put Debelo brdo tamo Stanovi, kako se zove, je 19.000 KM i u tih 19.000 KM trebalo je spomenuti najvećeg donatora Hodžić Kemala koji je dao 15.000, a ostalo su dali građani Klokočnice, Brijesnice i ne znam ko je sve više dao. Prema tome za rad mjesne zajednice ostalo je negdje 50 i nešto hiljada KM. Da bude zlo preko pola tih sredstava se finansira aparat administracije Mjesne zajednice i ne samo u Klokočnici, to je prisutno i u Velikoj Brijesnici, Brijesnici Maloj i svim drugim mjesnim zajednicama. Na tome mi moramo raditi. 27.000 KM je otišlo za finansiranje sekretara mjesne zajednice Klokočnica sa svim onim troškovima i članova Savjeta Mjesne zajednice Klokočnica. Nije to malo i o tome mi treba da raspravljamo na ovom Vijeću i da tražimo moduse i rješenja kako da te troškove svedemo na minimum, a da nam mjesne zajednice funkcionišu kako treba i kako bi građani bili još zadovoljniji i još više davali potpore za realizaciju bilo kojeg projekta, odnosno akcija za rješavanje lokalnih problema na Doboj Istoku. U tome je problem i na tome mi treba da radimo, a o tome sam ja i prošle godine govorio kada sam rekao da u Mjesnoj zajednici Klokočnica imamo 60 i nešto hiljada KM prihoda po osnovu kirija. Samo 10 % godišnje da smo izdvajali za opremanje doma kulture i svih tih objekata, sve bi to blistalo. Na kraju krajeva se krenulo iz nekih drugih izvora, a ne od strane Mjesne zajednice. Kada već govorimo o mjesnim zajednicama imat ćemo prijedlog da se i Telemahu da saglasnost da se potpiše ugovor da i oni kablove provlače. Mi vidimo koje je to ruglo, ako ništa bar magistralnim putem, jer je jedan otišao na lijevu stranu, drugi na desnu, treću naprijed, četvrti nazad. Dajte da bar ta sredstva koristimo u te svrhe da bar magistralnim putem ispravimo kako treba te stubove da oni funkcionišu, pa neka se vješa kako ko hoće. To nije lijepa slika, jer kablova nema kakvih nema u općini Doboj Istok na svim tim stubovima od javne rasvjete, pa dalje.“

Hasan Hasančević, predsjednik kluba vijećnika SDA: „ Pošto se prvi puta javljam sve vas selamim i pozdravljam. Nisam mislio izlaziti za govornicu danas, jer imam nekih zdravstvenih problema, ali ne mogu odoliti kada je u pitanju rad savjeta mjesnih zajednica. Pričat ću općenito o svih pet. Lijepo je čuti da kolegica Emira kaže jedno je centar Sarajevo za jednu mjesnu zajednicu, a druga je drugo, pogotovo kada dolaziš iz te mjesne zajednice. Za sve što je vani zaslužni smo mi ili oni u savjetu. Znači treba doći do podataka kako se dolazilo do kirija, kako se dolazi do poslovnih prostora koji su u vlasništvu mjesnih zajednica, kako se iznajmljuju poslovni prostori i kako doći uopšte do „pare“ da bi je mogli rasporediti. Nažalost mi pričamo o primanjima nekih ljudi u savjetima mjesnih zajednica, neću pričati o sekretaru, to je mizerija. Ko je radio u savjetu mjesne zajednice zna da je to mizerija. Međutim pošto smo mi politički organ i dolazimo u poziciju da raspravljamo o svemu, pa i o tome, a tako i oni o nama raspravljaju koliko mi potrošimo kao Vijeće i kao vijećnici koliko koštamo općinu, da li smo šta uradili ili nismo. To se karikira jedno na drugo i onda ide i po političkom i po lijep mi, ružan mi, sviđa mi se, ne sviđa i donosimo neke zaključke. Vidite kako su sve tačke dnevnog reda izgledale lagano i kada dođemo u poziciju da razgovaramo nisu lagane ni malo. Pravobraniteljica je rekla kada je bio njen izvještaj, pa jedna od tačaka javno dobro, niko nije spomenuo da komunalni redar i inspektor moraju ići sa pravobraniteljicom tamo da se raspravlja o oduzetom javnom dobru, odnosno uzurpiranom. Zahvalio bih se komandiru koji je spomenuo saradnju, pa ćemo se vezati za rad savjeta mjesnih zajednica za saradnju. Svi smo mi savjet mjesne zajednice, svi smo mi stanica, svi smo mi inspektor kada želimo i kada hoćemo. Trebamo se potruditi ubuduće da olakšamo rad naših savjeta mjesnih zajednica. Možemo mi to odraditi, vjerujte. Da olakšamo rad Policijske uprave, da olakšamo rad svih javnih ustanova koje treba da smatramo da su naše, a ne samo da kritikujemo moglo bi ovo ili ono. Klub vijećnika SDA će podržati svih pet izvještaja savjeta mjesnih zajednica.“

Kemal Skopljak, vijećnik BPS: „ Ja sam malo zakasnio sa replikom, a htio bih replicirati gospodinu Sajibu. Lijepo je to ovako pričati, ali je krajnje licemjerno sa tvoje strane vezano za Mjesnu zajednicu Brijesnica Velika, jer si prvi digao ruku protiv inicijative da se pomogne upravo tom gospodinu, koji sjedi gore i izbio si mu neka sredstva da može raditi još bolje. Znači do sada se to moglo realizovati da pomognemo ljudima i to bi bilo ok.“

Emira Karić, predsjednica kluba vijećnika SDP: „Je li ovdje sekretar Mjesne zajednice Klokočnica? Jeste. Ja vas molim da mi objasnite, jer možda ja griješim. Ovdje je bilo riječi da je to veliki prilog građana, a ovdje kaže prilozi građana, osvrnut ću se na 2018. godinu.“

Dr. Ferid Konjić, predsjedavajući Općinskog vijeća: „Ovo je izvještaj Mjesne zajednice Velika Brijesnica i ne možemo prozivati nekoga, ako je tačka dnevnog reda završena.“

Emira Karić, predsjednica kluba vijećnika SDP: „Predsjedavajući, moram se osvrnuti, jer vezano je za diskusiju. Sjednice ionako traju po pet minuta ako ja ne izlazim, pa hajmo malo produžiti i građanima reći kako smo mi aktivni, kako mi radimo itd. Iduću sjednicu ja neću izlaziti pa će sjednica trajati 2 minute, pa ćemo svi lijepo otići kući. Kažete prilozi građana 53.000, a ovdje kaže u infrastrukturu je uloženo 63.000. Samo da mi objasnite šta je to. Ako su ovo kirije, gospodin je govorio o kirijama Mjesne zajednice Klokočnica.“

Dr. Ferid Konjić, predsjedavajući Općinskog vijeća: „Mi smo tačku dnevnog reda Klokočnica završili.“

Emira Karić, predsjednica kluba vijećnika SDP: „Govorio je kako je trebalo doći do kirija u Mjesnoj zajednici Klokočnica. Je li govorio moj prethodni kolega? Rekao je da je trebalo doći do toga, budi pošten Hasko pa reci. Ja razumijem da treba da dođe do toga, ali trebamo pomoći mjesnoj zajednici koja ne može trenutno doći do toga. Stvoriti neki mehanizam da bi Brijesnica Velika otpočela upravo to. Imamo neka sredstva i predložiti ćemo građanima i građani će sa nama zajedno učestvovati u tim sredstvima. Mislim da sam sada bila razumljivija i mislim da mene Medle shvata, a ako ne shvata ima i on pravo da kasnije izađe.“

Sajib Mešić, zamjenik predsjedavajućeg Općinskog vijeća: „ Zahvaljujem ja kolegi Kemalu što je iskoristio priliku da na neki način dovede u zabludu slušaoca i ove koji budu eventualno čitali zapisnik. Ja sam možda bio protiv nečega zato što si ti predložio, kao što i ti budeš protiv nečega što ja predložim. To je potpuno legitimno pravo. To što si ti nakačio i uvezao ovo, meni je žao i bojim se da nećemo zloupotrijebiti ime tog čovjeka, jer čovjek nije od govorancija, ali je čovjek vrijedan, čestit i pošten i radi svoj posao i ne bi trebalo da ga izlažemo takvoj mogućnosti. On ako započne to o čemu si ti govorio, a ja kao bio protiv, ja ti garantujem da će se to završiti i bit će to urađeno. Ne trebaš se puno sikirati, a sikiraš se iz razloga što si ti inicijativom to pokušao da nametneš, a to što nisi dobio potrebnu većinu, to je sasvim legitimna stvar bilo koga od nas 17 ovdje da bude za, protiv ili suzdržan. Kao što si htio da dovedeš u zamku ljude kada si govorio o izvještaju gdje je predsjednik savjeta mjesne zajednice kazao da je manje izdvajanja sredstava iz budžeta itd. Čovjek je vjerovatno mislio na jednu opštu stvar da je na osnovu toga mjesna zajednica pretvorena kao udruženje građana da bi na kraju rekao da su sve aktivnosti provedene u dobroj saradnji sa općinskim načelnikom i općinskim službama. Dakle, taj dio si zaboravio, a iznio si ono što tebi odgovara i to je legitimno i to ja poštujem. To je kontradiktornost i čovjek je nevješto napisao, ali ti si to iskoristio i u redu i ja to poštujem, tako da ne bi bilo nekih nejasnoća. Ovo o čemu si ti htio i želio, ja ti garantiram sa ovog mjesta da će to biti urađeno ako to naš Medle započne, a započeo će i bit će to završeno i bez tvoje inicijative, siguran sam.“

Mehmed Mehinović, predsjednik kluba vijećnika SBiH: „ Zaista nisam htio danas da pričam, osjetite vjerovatno po grlu, ali nije korona virus bio sam na testiranju, obična je upala grla. Izašao sam ponukan time da dolazim iz Mjesne zajednice Velika Brijesnica, jer tu živim i mogu samo 2 – 3 rečenice da kažem. Prije toga bih rekao da naš uvaženi predsjedavajući ima običaj reći i čekao sam kada će reći tačka dnevnog reda je Velika Brijesnica, a ovdje se svašta nešto spetljalo i kako se sredstva nabavljaju i ovo i ono. Ja mogu samo reći svim mjesnim zajednicama, znate da sam uvijek diskutovao o izvještajima mjesnih zajednica, iskrene čestitke ljudima koji rade i volonterski i oni koji imaju naknade, to je neka

mizerna naknada. Isto kao i u našem Vijeću, tako je i savjetima mjesnih zajednica ljudi se odriču svog slobodnog vremena, prigovora svojih komšija, prigovora ljudi, inicijativa itd. rade jedan odgovoran posao i naravno naša zadaća je da im pomognemo. Ja znam da općina pomaže, a možda to nije sve definisano kroz budžet na koji način pomaže, eto i kroz tu rasvjetu i kroz ovo ili ono. Ujedno bi jednu repliku dodao, imam pravo, na mog prethodnog govornika iskusnog političara Sajiba Mešića. Ja sam doživio ovo kao neku maltene prijetnju i ja znam da funkcioniše sistem tako. Od koga dolazi prijedlog da li od pozicije ili opozicije, ako je od pozicije on se prihvati, a ako je od opozicije on se odbija, ali to se prešuti. Shodno na njegovo iskustvo čudi me da je tako to izletio, jer to se prešuti, ali tako se radi. Drago mi je da je moja Mjesna zajednica izazvala ovoliko rasprave i očito je da tamo rade i ja želim da radite tamo dobro i ako Bog da još bolju saradnju da istvarite sa općinom i da to bude kako treba.“

Kemal Bratić, općinski načelnik: „ Nadam se da neću izazvati replike. Bazirat ću se ne na ove posljednje 2 – 3 diskusije nego na diskusije od prije. Mi se očito ne razumijemo ili nećemo da se razumijemo. Kada smo usvajali sve budžete i kada je dogovarano, možda ima 10 – tak godina, o raspodjeli tih sredstava i tamo stoji za rad savjeta mjesnih zajednica. Znači od kancelarijskog materijala do telefona. Nemojte da brčemo babe i žabe. Tih 4200 koje izdvajamo iz budžeta za svaki savjet mjesne zajednice, gdje smo linearno i Klokočnica kao najveća i koja broji 5 hiljada i nešto stanovnika i njima smo dali 4200 kao i Lukavici Rijeci ili nekoj drugoj mjesnoj zajednici koja ima manje prihode i to je isključivo za rad savjeta mjesnih zajednica. Ne radi se o tome da neko ne pomaže ni jednom savjetu, jer pomoć je i škola koju smo rekonstruisali. Nećete se vi Emira naljutiti, u Maloj Brijesnici i put koji smo rekonstruisali i nešto što ćemo raditi u Velikoj Brijesnici ove godine. U Klokočnici je evo dom kulture rekonstruisan. Sve je to pomoć mjesnoj zajednici i građanima svake mjesne zajednice. O tome se govori. Ja pozivam svakog vijećnika da ide na savjete mjesne zajednice i da čuje šta ti ljudi u savjetima govore, šta traže i da stanu na čelo akcije, da ne bude Medle, ako je u Velikoj Brijesnici ili Muamer u Klokočnici ili Hajro u Maloj Brijesnici, da to budu vijećnici koji se tobože brinu za rad savjeta mjesnih zajednica. Nemojte da prodajemo ovdje jedni drugima demagogiju i gubimo vrijeme. Za mene je kao načelnika svaka mjesna zajednica jednaka. Ono što ja tražim jeste da oni budu aktivni i da pokrenu inicijative. Naš je zadatak da obezbijedimo sredstva i u Stanić Rijeci i u Velikoj Brijesnici i u Klokočnici i svim drugim mjesnim zajednicama. Nema ni jedan savjet mjesne zajednice dovoljno sredstava. U Klokočnici je oko 140.000 i šta mogu uraditi sa tim, ne mogu ništa. Vrijednost radova na domu kulture je 160.000. Šta mogu uraditi? Čitav budžet da potroše, a u tih 140.000 je i 40.000 rasvjete i rad sekretara itd. Ja pozivam svakog od vas upravo kada smo govorili o komunalnim infrastrukturama saradujte sa svojim savjetima. Svaka inicijativa koja dođe, ja je neću odbiti, vjerujte mi, principijelno iz bilo kojeg savjeta da dođe. Nemojte da brčemo ovo, ovo je za rad savjeta mjesnih zajednica tih 4200. Ako neko hoće da mi to povećamo, pa da damo po 100.000 KM savjetima za njihov rad, ja sam za. Ja neću biti protiv ako je neko procijenio da imaju toliki obim tehničkog posla i sekretari i ne znam ko sve radi ili da treba povećati paušale da budu veći od vijećničkih gdje imaju, jer ima naravno i volonterskih. Cilj je da predsjednik sazove savjet, da pokreću inicijative i da svaka inicijativa dođe ovdje u ovu zgradu i onda zajedničkim snagama idemo da to realizujemo. Nemojte da džaba gubimo vrijeme ja vas molim, raspravljat ćemo, kampanja još nije zvanično krenula i kada krene raspravljat ćemo po čitav dan ako treba.“

Sajib Mešić, zamjenik predsjedavajućg Općinskog vijeća: „ Ne, ne i ne. Nije mi bio cilj bilo kome da ispadne ili da izgleda tako da neko nekome ovdje prijeti, a kako ko to shvati ima pravo. Meni je cilj bio samo da podsjetim, kako reče kolega kao stari i iskusni političar, na neke stvari kako funkcionišu. U neko bilvaktile vrijeme imao sam i ja puno inicijativa, pa su nailazile na odbijanje i nisam zbog toga izvršio harakiri. Svako ima pravo biti za, protiv ili suzdržan. Ja sam htio da podsjetim kako nešto funkcioniira, a sada što su takva vremena i takve okolnosti to je jedna druga priča.“

Emira Karić, predsjednica kluba vijećnika SDP: „Ja sam samo izašla da prisutnima dokažem, pored svega i diskusija kolege Sajiba, da kada si u većini sve ti je dozvoljeno. Naš općinski načelnik nije se posebno doticao ove tačke dnevnog reda tj. Savjeta Mjesne zajednice Brijesnica Velika, a predsjedavajući ga ni jednog momenta nije ni prekinuo, ni ukanalio u tom smjeru, a ja se prekidam. Kažem slažem se sa kolegom Sajibom, jeste da je on četiri godine govorio mojim jezikom, a sada se uopšte sa mnom ne slaže. Ovdje nam je rekao šta znači, a vi vidite da nije korektno predsjedavajući kod nekog insistirati na pravilima, a kod nekog ne.“

Dr. Ferid Konjić, predsjedavajući Općinskog vijeća: „Kada se proziva i traži se odgovor nekog čija je tačka završena svako će biti prozvan. Prozvala si sekretara Mjesne zajednice Klokočnica da odgovori, a mi smo zatvorili tačku dnevnog reda Klokočnica i normalno da moram zaustaviti. Svi savjeti rade dobro i rade koliko mogu. Ja imam različit pristup svemu tome. Mislim da savjeti ne trebaju pomagati udruženja, nego treba biti obrnuto da udruženja pomažu savjetima u realizaciji, jer svi su na usluzi ljudima. Nažalost svako očekuje da mu neko da pare, a treba imati inicijativu i donositi projekte i na taj način će se sve realizovati. Ova sredstva što se dobiju iz budžeta svi znamo da nikome ne može biti dovoljno. Ako ima inicijativa i sva udruženja očekuju da dobiju pare od nekog da im da i da to se raspoređi. Znači podnesi inicijativu, proprati to i odradi i sigurno će biti. Možemo mi diskutovati do sutra, ali se vjerovatno nikada nećemo složiti. Dajem na izjašnjavanje ovu tačku. Ko je za Izvještaj?“

Glasanje: ZA – 16, PROTIV – 0, UZDRŽANIH – 0.

Emira Karić, predsjednica kluba vijećnika SDP, je zatražila pauzu.

Predsjedavajući je dao pauzu do 11,30 sati.

Ad.7. Razmatranje i usvajanje Izvještaja o radu Savjeta mjesne zajednica Brijesnica Mala za 2019. godinu.

Dr. Ferid Konjić, predsjedavajući Općinskog vijeća: „Ja ovdje ne vidim predstavnika savjeta mjesne zajednice Mala Brijesnica, a mi imamo od ranije dogovor da kada nemamo predstavnika da ne raspravljamo o tački. Ja ću dati na izjašnjavanje jesmo li mi za odluku koju smo ranije donijeli, pošto nema ni predstavnika Lukavice Rijeke i Stanić Rijeke, a niko se nije najavio nama pa da imamo opravdanje. Nema predsjednika Mjesne zajednice Klokočnica, ali je došao sekretar, nema ni predsjednika Mjesne zajednice Brijesnica Velika, ali je došao predstavnik, a ovdje nemamo nikoga. Ja dajem na glasanje prijedlog da ova tri izvještaja danas ne razmatramo, a vidjet ćemo kada ćemo razmatrati i obavijestiti savjete mjesnih zajednica da dođu na sjednicu. Ko je za?“

Glasanje: ZA – 16, PROTIV – 0, UZDRŽANIH – 0.

Ad.10. Razmatranje i usvajanje Izvještaja o radu Komisije za utvrđivanje prometne vrijednosti nepokretnosti i prava za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za ovaj Izvještaj?“

Glasanje: ZA – 16, PROTIV – 0, UZDRŽANIH – 0.

Ad.11. Razmatranje i usvajanje Informacije o sigurnosti na području općine Doboj Istok za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Izvještaj je kao i uvijek sadržajan i iscrpan i čini mi se sa velikim pomacima u plusu. Malo mi se ne sviđa ovaj program pisanja ovog izvještaja, nije ustaljen, pa se malo slabije snalazim. Ja bih samo jedan prijedlog dala, a možda i presedan, da predstavnik uz pomoć žive riječi nam objasni kakva je situacija i sa čime se on i Policijska stanica bavila u 2019. godini, šta je po njima krucijalno i na čemu se treba zasnivati rad u 2020. godini, šta je dobro, a šta nije. Moj je prijedlog da prvo čujemo predstavnika koji je došao povodom ove tačke.“

Dr. Ferid Konjić, predsjedavajući Općinskog vijeća: „Prednost imaju vijećnici, da ne bi predstavnik izlazio više puta, objedinit će se na kraju sve.“

Sajib Mešić, zamjenik predsjedavajućeg Općinskog vijeća: „Nama je ponuđena informacija o sigurnosti na općini Doboj Istok iz koje možemo vidjeti, naravno kroz tabele i pisani dio, kako stvari stoje u smislu na prethodni period. Mislim da iz nekih svojih iskustava i saznanja da je rad Policijske stanice na Doboj Istoku zadovoljavajući. Mislim da su uposlenici dosta fleksibilni i da razumiju lokalnu zajednicu, da imaju dobru saradnju sa lokalnom zajednicom, a pored svega toga i profesionalni su, rade svoj posao

onako kako treba. Moja namjera je bila da sugerišem komandiru jednu stvar, a to je sljedeće: u nekakvim večernjim satima, između 18 i 19 časova, da li igrom slučaja ili je to zaista tako, na potezu između dvije Brijesnice od mosta pa do Vegafruta događa se nevjerovatna brzina vozila da smo se mi zaprepastili. To govorim, jer sam par puta šetajući to vidio i to se dogodilo u dva tri navrata. Da li je to igra slučaja, da li se u to doba nešto događa, da je prosto nevjerovatno kojom brzinom su vozila prolazila i preticala na tom pravcu. To je moja ljudska i građanska sugesija da se tamo pokuša nešto vidjeti i obratiti pažnja, a ne mijesajući se naravno u vaše poslove i u vaš plan rada, operativni itd. To je jedna građanska sugestija da se obrati pažnja, a čini mi se da ste svjedoci da je bilo tu udesa i da je na benzinsku bilo udara. To je jedan segment i osjetio sam potrebu da sugeriram, a inače po meni je rad zadovoljavajući što se tiče Policijske uprave.“

Selmin Karić, vijećnik SDA: „ Uvaženi predsjedavajući, zamjeniče, načelnice sa saradnicima, kolege i kolegice vijećnici, predstavnici medija selam alejkum i dobar dan. Informacija je urađena dosta dobro i sadržajno. Kao što vidimo sigurnost je iz dana u dan sve bolja i vjerovatno veliki trud ulažu pripadnici Policijske stanice, odnosno službenici. Ono što sam ja primijetio, naročito kada je u pitanju bezbjednost saobraćaja kao što vidimo broj saobraćajnih nezgoda je manji za 20%, saobraćajnih nezgoda sa smrtnim ishodom. Nije bilo u protekloj godini i to je vjerovatno zbog povećanog broja službenika na terenu, ali je sigurno i zbog novog radara koji je došao na ove naše prostore i na našu inicijativu i zalaganje načelnika i komandira Policijske stanice. To je možemo reći izuzetno dobra stvar. Naravno kao i svake godine hoću da pohvalim pripadnike naše Policijske stanice, a vezano je za akciju šuma, koja se konstantno provodi i u protekloj godini i u 2018. godini nije bilo nikakvih dešavanja vezano za neovlaštenu sječu, odnosno krađu šuma koja je u ranijem periodu bila izuzetno izražena na našem području. Ja se nadam da će se ovakav rad nastaviti i u budućnosti i želim im puno uspjeha.“

Mehmed Mehinović, predsjednik kluba vijećnika SBiH: „ Klub Stranke za Bosnu i Hercegovinu će podržati ovu informaciju i ne samo da će je podržati nego je i pohvaljuje i iskrene čestitke komandiru i svim njegovim saradnicima. Naravno uzet ću dvije tačke koje smo ja i moj kolega Safet prokomentarisali, a to je podatak da 4.500.000 vozila prođe kroz Doboju Istok. To građani znaju šta to znači. Znači ipak nema nesreća koliko vozila prođe, a to znači da je dnevno prođe 12.328 vozila. Treba to izbrojati, a kamoli sačuvati da ne bude udesa, jer znamo kakav je položaj i kakve su škole itd. Ako ništa drugo nije u redu, u redu je taj podatak. Naše policajce vidimo svaki put, ono što sam ja govorio i kada je bila prošla informacija, pred školama i na pješačkim prelazima i želim samo da tu brigu ako imaju moći i snage da nastave i da bude što manje udesa. Drugo što sam htio da prokomentarišem, a vjerovatno su mnogi preletili preko toga, a to je da su oni posmatrali jedan period zadnjih 10 godina gdje se najviše udesa dogodi na općini Doboju Istok, a to je stari – novi Suhopoljski most i to može biti crna tačka. Naravno oni vode računa o tome i ako treba još nešto dodatno od ovog našeg organa i izvršnog organa da se urgira da se napravi ta tačka što bezbjednijom u naredbnom periodu, pa makar to bio trepćući semafor ili tako nešto, da ode neka inicijativa. Kriminalitet je u opadanju i iskrene čestitke svim uposlenim u Policijskoj stanici u Doboju Istoku.“

Kemal Skopljak, vijećnik BPS: „ U svakom slučaju podržat ćemo ovaj izvještaj, jer je izvještaj dobar. Pogotovo želim da skrenem pažnju i da se zahvalim, ne znam ko je bio nadležan, za rekonstrukciju prostorija CIPS-a koji je doveden u jedno izvanredno stanje. U vezi sa tim jedno pitanje. Sam ulaz u CIPS treba riješiti, jer se tu parkiraju auta i fizički sprečavaju ulaz stranaka u CIPS. Da li postoji mogućnost i ko je nadležan da ocrta zabranu parkiranja na tom dijelu.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Poštovani načelnice sa saradnicima, predsjedavajući, dopredsjedavajući, kolege vijećnici i vijećnice, uvaženi gosti, poštovani novinari želim sve iskreno da vas poselamim i pozdravim. Ja ću reći par riječi vezano za ovu Informaciju o sigurnosti na području općine Doboju Istok. Prije svega želim kao i moji prethodnici da dam svoje pozitivno mišljenje na ovu informaciju, a samim tim i na rad rukovodstva i uposlenika naše Policijske stanice na području općine Doboju Istok. Stanje je onakvo kakvo jest i na osnovu dokumenata koji su prikupljeni i bilježeni tokom cijele godine sastavljena je ova informacija. Meni je malo uši zaparalo komandiru, ne uši nego oči, da par puta ocjenjujete stanje, odnosno kada je pravljeno poređenje 2018 – 2019. godina ocjena je odlična. Je li to najveći nivo u ocjenjivanju? Je li to najveća ocjena što se tiče toga? Ako je tako, ja ću to prihvatiti, a stanje može biti sigurno još mnogo bolje. Pomno pratim i stvarno sam

kao građanin općine Doboj Istok na svaku pozitivnu stvar pozitivno iznenađen na rad vaš i vaših kolega i vaših uposlenika na terenu. Vidi se pomak i evidentno je da na veliki broj stvari svojim radom vi možete uticati, na neke stvari vjerovatno ne možete. Imamo pokazatelje u svim segmentima bezbjednosti i parametre 2018/2019. godina i skoro u svim parametrima 2019. godina je dosta bezbjedonosno bolja od 2018. godine. Mi u većini, a takva nam je svijest, više smo skloni da ističemo neke negativne stvari, ali ja vidim možda tokom zadnja 3 – 4 mjeseca angažovanost policijskih službenika recimo u Brijesnici Velikoj da nas obične građane nauče da mi moramo prelaziti pješački, da trebamo i da je zakon tako propisao. U ovom slučaju magistralni put ili saobraćajnice posebno obilježene horizontalnom signalizacijom i to je preventivno djelovanje, zatim i prema vozačima i to je za mene jedna veoma bitna stvar. Ima stvari koje mi na terenu ne vidimo, a koje vi radite. Taj radar velikom broju stanovnika i učesnika u saobraćaju smeta, meni ne smeta i dobro bi bilo da je tu prisutan 24 sata. U zadnje vrijeme iskren da budem ne vidim ga nikako ili je kamufliran u zadnjih 10 – 15 dana. Malo mi smeta radar u mojoj podružnici, u mom džematu Frkati, jer čini mi se da sa jedne strane nema saobraćajnog znaka da je ograničenje brzine kroz naseljeno mjesto u podružnici Frkati 40 na sat, a radar je veoma često u tom naseljenom mjestu. Po mojim informacijama ima posla i čak valja druge baterije stavljati u jednoj smjeni. Sve u svemu kada sagledamo kompletnu situaciju pozitivne kritike sa moje strane, ali kažem ocjena odlično baš, ali ako ste vi tako procijenili ok. Kažem da sigurno može bolje, složiti ćete se sa mnom da uvijek može bolje. Upoznat sam da u našoj Policijskoj stanici nedostaje puno uposlenika i možda je to jedan od ključnih faktora što se ne može još poboljšati bezbjednosna situacija, ali tako je kako je. Prije mene je kolega Mehinović je dobro vidio 4,5 miliona motornih vozila prođe magistralnim putem i nije to mala cifra, a rekao je koliko je to dnevno. Ima još posla pred nama i u saradnji sa lokalnom zajednicom i u saradnji sa obrazovnim institucijama, osnovnim i srednjom školom, vjerovatno se može još poraditi na bezbjednosti učesnika u saobraćaju, pogotovo pješaka. Na prethodnim sjednicama smo raspravljali o tim trotoarima koji vežu mjesnu zajednicu Klokočnica i srednju školu, odnosno osnovnu školu u Brijesnici. Ja mislim da će se u narednom periodu i to poboljšati. Već kada sam za govornicom, a mislim da mi Emira neće zamjeriti, predsjedavajući ja bih iskoristio priliku da im uručim pohvale, ne znam čija je inicijativa, za zamjenu ove tri lijepe zastave ispred općinske zgrade Doboj Istok. Znači vrijeme je da se zamijene i stvarno to lijepo izgleda.“

Hasan Hasančević, predsjednik kluba vijećnika SDA: „ Sama riječ sigurnost ne znači nama nekada puno, a nekada nam znači i previše i koja vrsta sigurnosti. Izašao sam da ponovim jednu stvar saradnja nas svih sa lokalnom policijom, odnosno sa Policijskom stanicom mora se podići na jedan veći nivo. Ja bih se zahvalio svim policajcima na obavljanju čestite dužnosti. Vi znate da oni dolaze na utakmice, na razna sportska dešavanja i obezbjeđuju. Izlaze u susret klubovima na razne načine tako da i u tom dijelu, u tom segmentu života oni učestvuju zajedno sa nama i to obavljaju na jedan dobar i korektan način. Podražat ćemo ovu informaciju i da nastavimo ubuduće ka boljem.“

Kemal Bratić, općinski načelnik: „ Komandire, kada puno hvale nije dobro. Ja imam tu privilegiju, a ne znam da li je privilegija ili nije, da imam više informacija nego vi i želim da se zahvalim iskreno komandiru na profesionalnosti i na jednoj dobroj i korektnoj saradnji. Smatram, neću se složiti sa Izetom, sa onim što oni raspoložu da može bit ocjena odlično, jer znam puno više detalja nego što vjerovatno svi vi, osim komandira, znate. Zašto ovo govorim? Obzirom na naš geografski položaj koji je veoma veoma dobar i pogodan za određene radnje protiv kojih smo svi mi i s obzirom na broj uposlenih koje naša Policijska stanica ima ja smatram da je rezultat odličan. Ono što je najbitnije i svi bi to tako trebali doživljavati je da idemo naprijed, da idemo ka boljem od nesreća, smrtnih slučajeva, da ne govorimo o drugim kriminalitetima. Ono što znam je da je dobar dio uspješnih akcija napravljen na području naše općine. Svako jutro dolazi izvještaj Policijske stanice da mi znamo šta to naša policija radi. Ja sam rukovodeći se razgovorom sa komandirovom i njegovim saradnicima napravio jedan radni sastanak, jer nedavno je bio u posjeti ministar unutrašnjih poslova i napravili smo dobar radni sastanak i razgovarali smo o tim problemima sa kojima se susreću naši policajci, naravno na čelu sa našim komandirovom Policijske stanice. Imamo obećanja od strane ministra unutrašnjih poslova da će malo preispitati tu sistematizaciju koja po mom mišljenju i po komandirovom trebalo bi da bude malo povećana upravo zbog tog geografskog položaja. Mi imamo sa svake strane pogodan teren da neko napravi krivično djelo i pobjegne u manji BH entitet. Znači ima tri pravca i nemoguće je da to pokrije naša Policijska stanica sa kadrovima sa kojima trenutno raspoložuje, a ima tu pred penziju, ima invalida i svašta ima sada. Kada se radi o CIPS-u na tom sastanku smo dogovorili sa ministrom unutrašnjih poslova da to općina preuzme da

finansira i općina je finansirala, a vi to znate vjerovatno, ali htjeli ste da me isprovocirate. Hvala vam ja sam to zaboravio, jer je to sitan projekat za našu općinu. Neko je govorio za parkiranje ispred CIPS-a i mi ćemo u skorije vrijeme vjerovatno imati zabranu saobraćaja u zanatskom centru u Klokotnici osim za hitnu i za dostave do određenog vremenskog perioda tako da neće biti potrebe. Sa rukovodiocem CIPS-a sam dogovorio da tamo onaj dio da se malo cvijeća posadi i da se naprave te ograde i nadstrešica, što znači da taj projekat još nije završen upravo da bi naši građani imali što bolje uslove. Nažalost nismo imali sluha u nekom prethodnom periodu ni od Ministarstva unutrašnjih poslova, ni od ministra, ali evo sada je ministar sa kojim smo mi dogovorili još niz drugih aktivnosti koje ćemo mi, ako Bog da, realizovati u toku ove godine, a sve u cilju da sigurnost na području naše općine bude dobra. Još jednom komandiru čestitam na profesionalnosti, na jednoj dobroj i korektnoj saradnji, na uvažavanju nas kao institucije i naravno i mi smo dužni da uvažavamo kako njega tako i sve naše policajce, jer ja uvijek kažem policajac je država, jer predstavlja državu, a ne sebe lično imenom i prezimenom. Čestitam još jednom.“

Faruk Avdagić, komadir Policijske stanice Doboj Istok: „ Ja vam se još jednom zahvaljujem. Ja ću krenuti od pozadi pa naprijed. Ja bih istakao ono što je bitno da ja naglasim kao komadir Policijske stanice. Što se mene lično tiče je to da ja živim u gradu Tuzla, da sam šećerni bolesnik, jer sa 2018. godine obolio od dijabetesa, zahvaljujući službi, da svako jutro ustajem u 5 sati kako bi na vrijeme došao na posao, odnosno izmjerio šećer i dao sebi određenu dozu inzulina, popio lijekove i došao. Moje putovanje svako jutro traje sat do sat i 15 minuta, a povratak kući čak i do sat i po, a nekim danima kada je zastoj i do dva sata. To su poteškove sa kojima se ja susrećem. Još veće poreškoće sa kojima se ja susrećem u svom radu je nedostatak ljudi. Vi morate biti svjesni da je ovo stanica koja broji ukupno 35 policijskih službenika, a od toga 33 policijska službenika koja su ovlaštena i dva službenika koja su neovlaštena. Najveći problem toga je starosna struktura koja većinom broji starije kolege koji su većinom po bolovanju i koji imaju na raspolaganju godišnjeg odmora u visini od 30 radnih dana. Na ovaj broj ljudi uzmemo ljude koji rade u administraciji i ja imam na raspolaganju vrlo malo ljudi koji mogu biti na terenu. Tako ja kroz dnevni raspored kada uzmete broj ljudi koje imam da imam pet na bolovanju, da imam pet na godišnjem odmoru i jednog suspendovanog čovjeka i to je 11 ljudi. Ja moram ispuniti sve obaveze koje se meni nameću kao komandiru Policijske stanice od strane Ministarstva unutrašnjih poslova, a najveća i poražavajuća činjenica je to da po uputama Ministarstva mi moramo imati jednu stalnu autopatrolu na magistalnom putu. Ta patrola je jedna jedina u toku 24 sata kako u prvoj smjeni tako i u drugoj smjeni. Vi zamislite kako mi ispunjavamo obaveze koje su nama nametnute, a znate vrlo dobro da dva službenika u toku 12 sati imaju 4 - 5 zavedenih akcija koje se neprestano prekidaju iz razloga što postupamo po prijavama svih građana, postupamo po prijavama Doma zdravlja, pružamo asistencije, izlazimo na uviđaje saobraćajnih nezgoda i narušavanja javnog reda i mira i učestale pojave povrede djece u osnovnim školama, jer na svaku povredu patrola mora otići u Dom zdravlja, mora obaviti razgovor, mora sačiniti zabilješku, mora pronaći lice, mora otići u školu i sačiniti još jednu zabilješku. Znači mi konstantno svoje prisustvo na cesti svedemo na minimum. Kada sagledamo to sve Ministarstvo unutrašnjih poslova ne zanima ta činjenica već samo gledaju, ako su naložili neku akciju koji su rezultati po toj akciji. To što patrola u tom momentu nije bila na mjestu gdje je predviđeno izvođenje akcija, mi imamo slabe rezultate i nama se nalaže ponavljanje akcije što nama donosi još veći obim poteškoća u radu. To je sve ono sa čim se mi susrećemo. Kada govorimo o utakmicama da li bio mali fudbal u sportskoj dvorani, da li bio veliki fudbal znate da mora biti veći broj ljudi, ja ovdje imam tolike probleme sa kojima se suočavam da moram ljude moliti, ako je bio u prvoj smjeni, pa treba sutra u noćnu, da dođe da odradi 3 - 4 sata na utakmici da bi mi zadovoljili formu, jer delegat kaže utakmica neće početi ako nema ovlaštenog službenog lica na utakmici, da li bio mali ili veliki fudbal. Tako isto za bilo koju manifestaciju koja se dešavala policijski službenici moraju biti prisutni. To su znači konstantno problemi sa kojima susrećemo. Ja sam pobjegao od stereotipa zadovoljavajuće stanje sigurnosti. Zadovoljavajuće stanje sigurnosti ja bih izjavio kada rezultati nisu dobri, pa možemo to nekako potkrijepiti da su rezultati zadovoljavajući. Kada sam govorio o javnom redu i miru imamo dva događaja manje u 2019. godini i zato sam i stavio tamo da je vrlo dobro. Moglo je biti odlično, ali nije. Najvažnije je da nemamo narušavanja javnog reda i mira u većem obimu i nemamo narušavanja javnog reda i mira od strane maloljetnih lica. Kada govorimo o saobraćaju najjači pokazatelj je taj broj saobraćajnih nezgoda da je u opadanju za razliku od prošle godine za 13 saobraćajnih nezgoda manje, odnosno za 22 %, da nemamo smrtno stradali lica što je najveći prioritet u svemu ovome i da nemamo teško tjelesno povrijeđenih, odnosno jedno lice u odnosu na prošlu godinu kada je bilo šest lica. Sve su to pokazatelji koji pokazuju aktivnost službenika policije. Zato je ovo stanje odlično, jer vjerujte kada sa ovim date nekom nešto da radi, a nema

uslova i napravi ovakve rezultate mene bi sramota bilo napisati da je dobro, a ne odlično. Vi to shvatite kako hoćete. Ovo što sam ja napisao odlično, jer sam ja radio ovaj izvještaj, je da bi vas zaintrigiralo da obratite pažnju i da malo drugačije pogledate ovo sve. Sam pokazatelj, taj brojač prometa koji se nalazi u Klokočnici broji samo vozila koja prođu dole ili dođu dođe, a šta je sa vozilima koja dođu do Klokočnice i do općine njihovo kretanje se ne mjeri. Onda prioritet su nam djeca. Kako sam došao ovdje prije dvije godine najveći prioritet su mi djeca. Radar koji smo mi uspjeli dobiti je radar polovan sa kojim naši policijski službenici nisu imali mogućnost da se susreću i u početku je bilo jako teško naučiti kako funkcionise automatski način rada što se pokazalo jako dobrim. U 2019. godini imamo preko 1.000 prekršajnih naloga izdatih samo na osnovu radara. To znači preventivno djelovanje zbog nastanka saobraćajnih nezgoda i ja vjerujem da je to jedna od većih mjera koje smo mi poduzeli kako bi došlo do smanjenja toga. Svako jutro od 7 do 8 sati u jednom pravcu i od 8 do 9 sati u drugom pravcu možete vidjeti automatski način snimanja radara ispred Policijske stanice radi toga što se tu nalazi osnovna i srednja škola. Taj radar u toku dana nema nikakvih rezultata bez obzira što on tu stoji, ali meni nije bitan rezultat i da mi uhvatimo nekoga ko je prekoračio brzinu, bitno je da vozač zna da nailazi na mjesto gdje ima radar i da on uspori. Vjerujte ja sam svaki dan ondje i gledam kako djeca i ne gledaju i pretrčavaju cestu i što me jako ljuti naši građani koji prelaze mimo obilježenog pješačkog prelaza. Neka se ljuti na mene ko hoće ja izađem, a policajac kaže ja ne mogu kazniti to mi je komšija, to mi je tečić, to mi je dajdžić i ja razumijem. Ja ne mogu da razumijem da taj isti može pet puta danas proći mimo pješačkog i da se smije policajcu. Ja kada siđem dobit ćeš kaznu za to. Znači treba im podići svijest da prelaze na pješačkom prelazu. Da nemamo obilježen pješački prelaz ne bi ni mogli izvoditi akciju, ali imamo kod Binga i imamo kod pekare obilježen pješački prelaz. Kada mi naučimo ljude da poštuju to nama će biti lakše. Postavlja se pitanje šta sutra policajac koji bude na obezbjeđenju stanice i da se desi pred njim nezgoda, neko dijete ili školarac nastrada ne dao Bog, on ode na disciplinsku zato što je njegova dužnost bila da prevodi što inače i radi. Znači svim snagama i svim silama se trudimo da rezultate napravimo što povoljnijim. Ja ću vam navesti jedan primjer sa čime se suočava noćna smjena. Mi smo imali do sada u 2019. godini 24 razrješenja slobode sa dva službenika, a ti službenici nisu koji poznaju borilačke vještine ili neke druge stvari, jer budu lica koja su veća od obadva službenika, ali valja se izboriti, pa ga lišiti slobode, pa ga dovesti u stanicu, pa popuniti evidenciju, pa ga odvesti u prostorije za zadržavanje u Gračanicu i sve to ta dva službenika. Za to vrijeme dok su ta dva službenika na toj akciji i po tom postupanju naše granično područje je pusto i može raditi ko šta hoće i može se odnijeti sve. Patrola koja mora biti na magistrali ostavlja prostor gore od Frkata, prema Lukavici Rijeci prazan prostor. Jednostavno nemamo dovoljan broj ljudi, a to je ono što sam ja i kada je bio sastanak spomenuo načelniku općine da mi moramo povećati sistematizaciju, a nama i onako fali broj ljudi. 4 službenika su napustila Policijsku stanicu i otišla u Njemačku, a nije se popunilo i to je najveći problem. Mi ako ne napravimo sada kada Vlada bude donosila odluke i zaključke da se pravilnikom pojača, jer zašto mi ne bi imali kao u Jelahu i Tešnju veći broj policijskih službenika. Zašto ova Općina ne bi zaslužila da ima u toku jedne i druge smjene dvije auto patrole? Sada navodim da bilo šta da se desi patrola mora napustiti sve i preći na drugu stranu da radi po tim prijavama. Mi postupamo po prijavama građana i mi moramo ovo što je nama naloženo prekinuti i otići postupiti po prijavama građana. Iz tih razoga je to najveći problem sa kojim se mi susrećemo. Dvije godine sa ja u ovoj Policijskoj stanici i za ove dvije godine od MUP-a nismo dobili ništa. Znači od opreme nismo dobili ništa. Dobili smo polovan radar od Lukavca zato što je Lukavac dobio novi radar, u stvari dobili su dva radara i Gračanica je dobila dva radara. Neko je spomenuo od 18 do 19 gore i znamo mi to vrlo dobro. U ovom periodu najveći problem je noć i ovaj radar ne može vršiti noćno snimanje. Postoje radari za noćno snimanje, ali ga mi nemamo. Ja bih volio da imamo mogućnost da imamo taj radar da vršimo noćno snimanje. Naše svako postavljanje radara je javno i transparentno i nećete vidjeti kao na drugim općinama sakriven radar nikada. Bude službeno vozilo i uz službeno vozilo bude radar. Što se tiče Frkata gore, mi smo na prijedlog i u razgovoru sa predstavnikom mjesne zajednice koji je nama ukazao na problem da u toku popodnevnih sati građani se kreću gore velikom brzinom, a ima djece koja pješke idu u školu i vraćaju se. Stavili smo taj radar i pokazao je izuzetne rezultate i ja uvijek kažem sviđalo se to kome ili ne sviđalo oni donose određene rezultate. Ja sam plaćam, bez obzira što sam komandir i što radim u ovoj ustanovi i za radar i za parkiranje. Ko god ne vjeruje neka dođe u moju kancelariju sve ću naloge pokazati koje sam ja kao građanin platio. Nikada se nisam stavio u poziciju da sam povlašten i da se ja izvlačim zbog tih stvari, ja sam komandir Policijske stanice i možete li vi to meni skloniti. Ne, i ja kada sam u službi u službi sam, a kada sam u vožnji i ja sam kao obični građanin podliježem svim prekršajima. Da vam pročitam uporedne pokazatelje kada su u pitanju poduzete mjere od strane policije u 2019. godini u odnosu na 2018. godinu. Broj izdatih prekršajnih naloga u 2018. godini

je 2306, a moram vam reći broj prekršajnih naloga u odnosu na 2017. godinu je bio gotovo duplo veći, a sada smo uspjeli da povećamo sa 2306 na 2679 što je za 373 prekršajna naloga više u odnosu na prošli godinu. Broj vozača zatečenih bez upotrebe sigurnosnog pojasa koji su zatečeni prilikom akcija provedenih od strane Policijske stanice je veći za 33, znači 125 u 2019. godini, dok je u 2018. godini bilo 192. Sada da vam ne nabrajam sve pokazatelje, ali uzmete da je kontrolisano vozila 12.507 u 2019. godini što je za 1488 vozila više, da je kontrolisano i legitimisano 336 lica u 2019. godini, a prošle godine 259, što je za 77 lica više. Upotreba alkohola – testirali smo više za 1495 u odnosu na 1135 u 2018. godini, a zbog upravljanja alkoholisanih lica 92 prekršajna naloga što je manje za 44, odnosno 136 u 2018. godini. To su pokazatelji da policijski službenici rade, da rade izuzetno i vrlo dobro, odnosno odlično. Svi pokazatelji zadani akcijama koji su na nivou policijske stanice na nivou MUP-a su donijeli određene pozitivne rezultate. Moram vam reći da smo mi jedna od najboljih stanica gledajući stanice manjeg obima, a to su Čelić, Teočak i Sapna, a čak smo u pojedinim segmentima bolji i od Kladnja. Ovo stanje treba zadržati, a mi ćemo se truditi i nastaviti. Kada vi imate problema da nemate radne snage, a ovakve rezultate imate možete pričati šta hoćete i gledati u mene kako hoćete ja ne mogu staviti bilo kako nego odlično. To je moje lično i subjektivno pravo, a neko se slagao ili ne slagao. U MUP-u se neće salagati sa ovim, jer su i oni dobili ovo i milion će pitanja i potpitanja imati. Sve što je naložemo mi smo ispoštovali i sa ovim kapacitetom mi smo čuda napravili. Znao sam noćima ne spavati, jer treba nešto napraviti, imate akcije, imate probleme, imate problematiku a kako, s kim, s čim, koga. Meni mora u patroli biti stariji policajac i policajac, jer vođa patrole mora biti stariji policajac. Meni fale 4 starija policajca i kako da ja stavim 2 policajca i sa njima kršim pravilnik. To njih gore nikoga ne interesuje. Što se tiče otkrivenosti krivičnih djela ova Policijska stanica je imala u 2018. godini 48, a u 2019. godini 38 krivičnih djela. Ukupan broj krivičnih djela 48 i 41, a to je 7 krivičnih djela manje, a sve je rezultiralo operativnim radom pokrivenosti terena krim grupe. Druga stvar kada govorimo o aktivnosti po nepoznatom počiniocu mi smo imali 23 krivična djela u 2018. godini, a 22 u 2019. godini. Naknadno je rasvijetljenih krivičnih djela imali smo u 2018. godini 9, a u 2019. godini 14 što je za 5 više. Ukupan broj otkrivenosti krivičnih djela na području općine Doboj Istok je 64% i kada uzmete stanice tipa Tuzle gdje su otkrivenosti 30–40 % , a 64 % je izuzetno dobar pokazatelj. Kada govorimo o akciji „FIKS“ koju smo mi zaveli na nivou Policijske stanice u periodu do sada ukupno smo lišili slobode 7 lica i podnijeli izvještaj o počinjenom krivičnom djelu, dok smo kod jednog lica pronašli tablete subokson koji je na listi psihoaktivnih supstanci i koje su poslate na vještačenje i otišlo u izvještaju i to smatramo 8. Ono što je bitno napomenuti da je početkom 2019. godine kordiniranom akcijom na području Policijske stanice općine Doboj Istok zaustavljeno putničko motorno vozilo audi iz Sarajeva kojom prilikom su službenici Policijske stanice Doboj Istok našli 70 kg skanka. Taj rezultat nije otišao u javnost kao rezultat Policijske stanice Doboj Istok, već je preuzeo sektor kriminalističke policije Policijske uprave Tuzla, odnosno MUP. Najveća poražavajuća činjenica je bila da naši službenici nisu dobili ni pohvalu za Dan policije, dok su drugi preuzeli zasluge. To je ono na čemu se konstantno borim da istrajem. Sada vi mene morate razumjeti na kakvom sam ja položaju. Zato kažem hvala vama svima na razumijevanju, hvala Općinskom načelniku, hvala njegovim saradnicima i hvala svim građanima općine Doboj Istok. Od ovoga što je uvažena vijećnica Emira Karić pitala koji su problemi i ja sam naveo probleme, a pored toga nam nedostaju vozila, radio veze, računari, stolice, stolovi, sve je staro, a 13 godina stanica nije okrećena. Ja bježim da od privatnika tražim da mi nešto učini i to niko nikad neće doživjeti od mene lično. Sve što možemo mi ćemo udruženim sredstvima, napravili smo nadstrešcu, došao sam ovdje i vidio kakva je situacija u Policijskoj stanici i nije mi se sviđala. Otišao sam i podigao vozila, uspio sam odvući vozila u Tuzlu na odlagalište starih vozila, predali smo 8, ostalo je još 3 vozila koja se nalaze ispod sale. Onda smo zajedno sa udruženim sredstvima sjeli i napravili ko šta može. Najveću podršku nam je pružio načelnik općine, kome se duboko zahvaljujem, i njegovi saradnici. Znači sve se može kada se hoće, ali treba sve izmoći. Na početku sam rekao, to prvenstveno utiče na moje zdravlje.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Ja se nadam da u svojoj prethodnoj diskusiji nisam pogrešno shvaćen. Ja imam svoje mišljenje o ocjeni i to sam iznio i to je tako. Komandir je ocijenio stanje kako jest i ja vas molim da me pogrešno ne shvatite. Ja volim reći da želim sam sa sobom da rasčistim neke činjenice. Htio sam da pitam, ova informacija je otišla kantonalnom MUP-u i ako vi kažete u svojoj informaciji da je stanje odlično, a fali radne snage. Ako kod mene u poslovnoj jedinici promet teče kako treba sa tolikim brojem radnika, a vi ste rekli odlično stanje, a fali 30 % i normalno da poslodavac u ovom slučaju MUP neće vam izaći u susret, jer imate stanje odlično sa tim brojem uposlenika koliko imate i to je tako. Ne znam da li ćete se složiti sa mnom ili nećete. Da je

ocjena i da li je uopšte mogla biti zadovoljava ili dobro, pa ok. Ako mi imamo, rekli ste 35 uposlenika u Policijskoj stanici Doboj Istok i obavljamo djelatnost za koju smo zaduženi sa ocjenom odlično, a treba nam, karikiram, 52 po specifikaciji radnih mjesta onda šta bi bilo. Kažem kakva je situacija bezbjedonosna što se mene tiče, ja se slažem sa načelnikom, oni ima svoje mišljenje i ima više ulaznih informacija nego mi i to je razumljivo. Ja nisam rekao da njegovo mišljenje nije u redu što ste vi okvalifikovali i donijeli ocjenu. Ja prihvatam ocjenu kakvu ste vi u informaciji naveli i to je tako. Ja mislim da je dobro i da rijetko koja sredina ima takvu bezbjedonosnu situaciju u praktičnom smislu. Samo u ovom segmentu u kojem ja govorim, mislim da razumijete šta sam htio reći.“

Emira Karić, predsjednica kluba vijećnika SDP: „Uvjerila sam se da nisam bezrazložno tražila diskusiju komandira, pa onda diskusije vijećnika, ali nije taj prijedlog prošao, pa smo imali diskusije koje su odnosu na tu živu riječ komandira se razilazile. Vi ste nam objasnili kakvo je stanje sigurnosti na području općine Doboj Istok i ja sam to shvatila ovako: u ovakvom stanju ovakva informacija zavisi samo od umješnosti komandira. Ja vam ne podilazim, niti ikome podilazim jednostavno neke stvari sebi poslažem u glavi i smatram da sve dok budete vi imali snage, energije i svega toga da će upravo ova ocjena i ostati ovakva. Vi ste samo iskreni i smatram da na osnovu vašeg izlaganja odličan i nije i ja vam dodajem primjerno vladanje ako ćemo vezano za moju branšu. Informacija je u pitanju i opet kažem informacije primamo k znanju, a stvar je naših zaključaka nakon informacija. Zaključci bi trebali ići nakon ove informacije, a zaključci će, a to će predsjedavajući ako većina prihvati, ići u smjeru da mi kao Općinsko vijeće smo razmatrali informaciju i shvatili da treba hitno i neophodno popuniti mjesta, rekli ste odlazak u Njemačku itd. te veća i konkretna materijalna sredstva. Smatram da bi to trebali biti zaključci koji bi trebali ići prema Ministarstvu. Mislim da bi tu bili efektivniji nego da raspravljamo da li je ocjena odličan ili zadovoljava. Ja se stvarno slažem ocjena zadovoljava top je eto tako dolazili ste na posao, ali ništa konkretno niste radili. Kažem svaka čast i nisam htjela u prvoj diskusiji i zamolila sam, ali svaka čast našoj stanici. Mislim da puno ulažete vi ako persona, kao osoba i vama hvala. Vi ste se i građanima i svima nama zahvalili. Želim da vas ta bolest ne omete u daljem radu i da imate energije i da i dalje ovakve informacije budu u našim rukama.“

Senada Džanić, predsjednica kluba vijećnika SBB – BPS: „I ja se pridružuje čestitkama komandiru i svim uposlenicima Policijske stanice. Poslije ovakvog izlaganja ne mogu a da ne kažem i kao građanin i kao direktorica škole i kao vijećnica i da vam se zahvalim za sve što činite na području sigurnosti na općini Doboj Istok. Bez obzira na sve probleme sa kojima se susrećete nikada se nije desilo da na neki od naših poziva ne reagujete i da ne uradite sve što je u našoj moći. Mislila sam u sklopu tačke Izvještaj Mjesne zajednice Stanić Rijeka navesti puno problema sa kojim se tamo susrećemo u mojoj mjesnoj zajednici, ali pomenut ću jedan koji je konkretno vezan za ovu tačku. Ja sam već ranije govorila o tome da na magistralnom putu u Stanić Rijeci nema obilježja da se nalazi škola i to je samo kao naseljeno mjesto, nema trotoara i naši pešaci su ugroženi. Mi imamo dva poginula u Stanić Rijeci upravo u dijelu gdje djeca svakodnevno prelaze da dođu do škole, odnosno po povratku kući. Često vidim patrolu tamo i zahvalit ću vam se. Međutim smatram da u ovom dijelu trebamo nekako zajednički reagovati na postavljanju trotoara i o tome sam i ranije govorila na postavljanju bilo kakve vrste signalizacije, odnosno upozorenja vozača da se nalaze na dijelu magistralnog puta koji vodi ka putu ka školi učenika koji prolaze.“

Dr. Ferid Konjić, predsjedavajući Općinskog vijeća: „Nema više diskutanata. Ja se zahvaljujem komandiru na ovom izvještaju. Za nas je najbitnije da je bezbjednost dobra i mi prihvatamo izvještaj. Ja imam drugi prijedlog, jer mi imamo poslanika ispred naše lokalne zajednice u Skupštini TK koji prihvata izvještaj ministra MUP-a o bezbjednosti i sigurnosti i koji može ove probleme sa kojima je upoznat da iznese, jer praktično Skupština je poslodavac ministru i to se može razriješiti. Mi odavde možemo samo prihvatiti ovu informaciju ili je ne prihvatiti na neki način. Znači imamo te mogućnosti i mehanizme, a ne možemo mi sada pozivati nekoga da radi svoj posao, jer nismo nadležni u tom, a imamo poslanika koji može iznijeti ovu bezbjednost i nepopunjenost na sjednici kada se bude raspravljalo o stanju u MUP-u. To je moje razmišljanje i na taj način možemo efikasnije uraditi.“

Emira Karić, predsjednica kluba vijećnika SDP: „ Hajde stavite ruku na srce i recite kada ste pročitali ovu informaciju da vam nisu toliko bile jasne stvari kao nakon diskusije komandira, meni bar. Slažem se poslanik nije uzaludan u Skupštini TK i trebamo reći ovakve stvari, ali samo kažem na osnovu onog što dobije poslanik in ostali poslanici nisu toliko pojašnjene neke stvari. Ja se takođe slažem da ovi

zaključci koji bi išli prema Ministarstvu i prema Skupštini mogu otići i poslaniku lično, a mogu i ja njemu prenijeti. Hajmo se složiti da postoji određena oficijelnost, a ne rekla kazala i prenijela itd. Ja ću svoj prijedlog proširiti zaključke poslati an Ministarstvo, na Skupštinu i poslaniku koji živi na općini Doboj Istok. Ako se slažete sa tim ja stvarno nemam ništa protiv. Ovo je bilo na nečiju adresu, a nemam potrebe, jer se radi o poboljšanju i stanice i svega. Ako se hoćete složiti što manje politikanstva ovdje, a što više efikasnosti.“

Dr. Ferid Konjić, predsjedavajući Općinskog vijeća: „Neko može sve shvatati da je politikanstvo, ali ja govorim o praktičnim stvarima i kako stoje stvari. Mi smo Općinsko vijeće i prihvatamo informaciju i to je naš domen. Mi ne možemo pozvati Ministarstvo unutrašnjih poslova da svoju obavezu ispuni i ništa drugo ne tražimo. Znači mi to ne možemo pozvati, ali Skupština TK može pozvati, a mi možemo jedino uputiti zaključak da uputimo Skupštinu kada se bude razmatralo da se da prijedlog da se ispoštuje ono što treba da se ispoštuje. Ništa mi više ne tražimo samo ono što treba da MUP odradi svoj dio da uradi. Što se nas tiče informacija nas zadovoljava da je stanje u redu, a o ovim stvarima mi ne možemo odlučiti. Znači možemo proslijediti u Skupštinu naš zaključak da kada se bude raspravljalo o bezbjednosti, odnosno kada bude ministar MUP-a podnosio izvještaj da se traži da se ispoštuju propisi koje nalaže služba prema našoj stanici.“

Emira Karić, predsjednica kluba vijećnika SDP: „ Iskreno ne pada mi napamet nikoga ovdje učiti neke stvari. Međutim hajmo prožeti šta znači informacija na lokalnom nivou, na kantonalnom nivou i na državnom nivou. Informacija znači da ti primiš informaciju, što sam uvijek govorila, primiš k znanju i nakon diskusija se daju određeni zaključci. Zaključci nisu bez veze, zaključci su konkretne stvari koje se odnose na tu informaciju. Zaključci se mogu prosljeđivati. Mislim da veliku veliku težinu će dobiti taj zaključak ako kažemo da Općinsko vijeće nakon tačke dnevnog reda Informacija o sigurnosti donosi sljedeće zaključke. Vi morate predsjedavajući sročiti taj zaključak koji ćemo mi prihvatiti ili odbiti i vidjeti kuda taj zaključak ide.“

Dr. Ferid Konjić, predsjedavajući Općinskog vijeća: „Ja sam već rekao naš zaključak je da smo zadovoljni bezbjedonosnom situacijom što nam je komadir iznio, jer je bezbjedonosno stanje dobro. Ja sam shvatiom Izu što je rekao nas u ovom trenutku interesuje samo bezbjednost i mi smo ovdje za bezbjednost. Izo je dobro to rekao, ako je odlična situacija onda nema potrebe niko da kaže mi trebamo popravljati. Vi radite dobro i nastavite raditi. Mi smo zadovoljni bezbjedonosnom situacijom i apelujemo preko Skupštine da se utiče na MUP da se ispoštuju propisi koji sleduju našu Policijsku stanicu. To je jedino što mi možemo. Ja sam rekao imamo mogućnost i mimo ovoga, jer imamo poslanika koji to može uvijek inicirati, a i do sada je mogao inicirati. Ja predlažem ovaj zaključak i ako još nekih drugih zaključaka izvolite.“

Emira Karić, predsjednica kluba vijećnika SDP: „ Predsjedavajući, mi kada dobijemo informativno vezano za izmjene i dopune zakona i lično nas se ne mora ticati gospodo skupštinski zastupnici imate 3.000 KM vi to odradite. Pokušajte se prisjetiti da sam imala, ne mogu se sjetiti koji je zakon, imala sam dva prijedloga koji su upućeni na određenu adresu glede izmjene i dopune tog zakona. Tako smatram da i ovakve informacije komandir ne ide na Skupštinu Tuzlanskog kantona, komandir nama iznosi određenu problematiku, a mi to usvajamo i primamo k znanju i eventualno reagujemo onako kako bi trebali što učinkovitije reagovati. Slažem se ne bježim od skupštinskog zastupnika i on će u svakom slučaju biti upoznat sa ovim, ali kažem da naš mehanizam je naš zaključak koji ide prema Skupštini TK, prema Ministarstvu itd. jer je to naše nešto što smo mi to poslali.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Mi smo spremni oko nebitnih stvari da potrošimo mnogo vremena. Jedna veoma bitna stvar koju je apostrofirao i načelnik i komandir, naglašeno je u prethodnom periodu da je bio radni sastanak ministra unutrašnjih poslova, komandira i načelnika. Pretpostavljam da je iznesena problematika sa kojom se susreće ova Policijska stanica ministru i normalno mjere za otklanjanje tih nedostataka. Znači izvršna vlast, komandir Policijske stanice, ministar i vjerovatno je to stavljeno u kratkim crtama nekakav sažetak i vjerovatno to ide u realizaciju. Slažem se ja sa zaključcima, komandir je nama u izlaganju iznio koji su problemi u radu Policijske stanice i mi smo primili k znanju i to je to.“

Dr. Ferid Konjić, predsjedavajući Općinskog vijeća: „ Ja ću još jedanput ponoviti. Mi ćemo ovu informaciju prihvatiti kakva jest s tim da uputimo zaključak prema Skupštini kantonalnoj da se apeluje, odnosno da se traži od Ministarstva unutrašnjih poslova da ispoštuje procedure, odnosno da ispoštuje zakon prema našoj Policijskoj stanici. To je jedino što možemo i možemo propratiti i ja ću na neki način propratiti taj zaključak da vidimo kako će se dalje odraditi. Mi samo tražimo da se ispoštuje ono što se traži da se ispoštuje prema našoj stanici što smo zaključili iz ovoga. I u ranijim izvještajima je to bilo, ne samo u ovom. U svakom izvještaju je bilo da fali ljudi i uvijek će faliti. Ja ne mislim da ćemo mi to razriješiti, ali da pokušamo na ovaj način da podupremo ako bude koristi. Ko je za Informaciju i za zaključak?“

Glasanje: ZA – 16, PROTIV – 0, UZDRŽANIH – 0.

Ad.12. Razmatranje i usvajanje Informacije o pripremnim aktivnostima za proljetnu sjetvu 2020. godine.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za Informaciju?“

Glasanje: ZA – 16, PROTIV – 0, UZDRŽANIH – 0

Ad.13. Razmatranje zahtjeva „Telemach“ društvo za pružanje usluga iz oblasti telekomunikacija d.o.o. Sarajevo za davanje saglasnosti za korištenje stubova javne rasvjete u Klokočnici.

Dr. Ferid Konjić, predsjedavajući Općinskog vijeća: „ Materijal ste dobili, dajem tačku na diskusiju.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Na Kolegiju smo malo razmatrali ovaj zahtjev i normalno naša je obaveza da uvrstimo na dnevni red i obaveza ovog Općinskog vijeća je da se izjasni po ovome. Ja sam pročitao dopis i prijedlog zaključka i ovdje se kaže Telemah je međunarodna komunikacija i djelatnost je telekomunikacija i jedan je od lidera u Evropi, bar po mojim saznanjima. Ovdje što je veoma bitna činjenica uputili su dopis Općinskom vijeću, odnosno Općini Doboj Istok i Općinskom načelniku. Tako je naslovljeno i malo je pogrešna adresa. Ono što želim da naglasim da bi to većina bila radova na kablovima koji već postoje od njihove mreže. Znači da se poboljšaju profili ili kako se to već kaže ti kablovi i ovdje kaže i eventualno proširimo staru mrežu kablovske televizije. Ne mogu biti ravnodušan, jer u drugom pasusu kaže da bi smo to mogli uraditi u okviru racionalnih troškova našeg posla tražimo da nam izdate saglasnost za korištenje vaših (općinskih) stubova u Klokočnici na osnovu ugovora između općine i Telemaha, a po cijeni i uslovima koje ostali operateri plaćaju i imaju. Ja sam na Kolegiju rekao nije ista pretplata svih operatera i prema tome ne može niko nas i ne bi trebao uslovljavati. Ako jedan operater ima 8 KM nadoknadu, a jedan 18, po meni ne bi trebalo da bude u istom položaju. Ovdje se traži da mi donesemo zaključak kao Općinsko vijeće da Općinski načelnik sklopi ugovor sa tom firmom. Čitajući i razmatrajući gledam zaključak meni je veoma bitna stvar ovdje nema roka trajanja ugovora. Samim tim ako nema to je neograničeno. Moja diskusija možda može pomoći u kreiranju tog eventualnog ugovora. Ovo je ozbiljna stvar, načelnik potpiše ugovor sada u martu - aprilu i mi donesemo odluku da trebamo skloniti te stubove da nam smetaju ti kablovi po centru Klokočnice i po centru Brijesnice ljudi kažu mi imamo ugovor gdje vi imate obavezu da to izmjestite, mi smo uredno izmirivali obaveze iz ugovora. Još jedna stvar, ali ovo je tehničke prirode ozbiljna kompanija a ovdje je samo u potpisu stavljeno Telemah d.o.o Sarajevo i neko je potpisao. Nema ni ime i prezime osobe koja je uputila taj zahtjev, ni koji je sektor, šta ta osoba obnaša, kome se obratiti. Malo mi neozbiljno djeluje.“

Emira Karić, predsjednica kluba vijećnika SDP: „ Kako vidite tačka je vezana za saglasnost, nije riječ o ugovoru i nemamo puno mogućnosti uticaja, jer gospodin načelnik će kreirati takav ugovor. Da li će se to nama svidjeti ili ne to ćemo vidjeti kasnije. Međutim samo jedna opaska mislim da ne bi trebali biti pristrasni kada je u pitanju cijena, jer ne možemo jednom operateru po ovoj, a drugom po onoj cijeni, mi se ne možemo deklarirati. Operater daje svoju cijenu prema građanima, a mi se odlučujemo da li prihvatiti tog operatera ili ne. Smatram da se ne bi smjeli upuštati u tu stvar pristrasnosti prema ovom ili onom operateru. Načelnik će odrediti taj ugovor, tako da mi ovdje samo kažemo da saglasni smo ili ne nismo saglasni.“

Hasan Hasančević, predsjednik kluba vijećnika SDA: „Složio bih se sa kolegicom Emirom i još da dodam mi ne prodajemo stubove kao općina, nego iznajmljujemo i nema obavezu on da nama nešto mudruje. Iznajmio sam i obje strane moraju biti saglasne po ugovoru, ako jedna nije prekida se.“

Dr. Ferid Konjić, predsjedavajući Općinskog vijeća: „Jasno je da mi dajemo samo saglasnost da se ide u pregovore. Ima li još diskutanata? Ako nema dajem na izjašnjanje. Ko je za davanje saglasnosti i za zaključak?“

Glasanje: ZA – 15, PROTIV – 0, UZDRŽANIH – 1.

Ad.14. Razmatranje plana upisa učenika u prvi razred srednje škole u školskoj 2020/2021. godini u JU Mješovita srednja škola Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju. Ne vidim prijavljenih i dajem na izjašnjanje. Ko je za?“

Glasanje: ZA – 15, PROTIV – 0, UZDRŽANIH – 0 (Kemal Skopljak je odsutan)

Na ovaj način smo došli do kraja ovog Vijeća. Ja ne želim čestitati Dan nezavisnosti pošto imamo zvaničnu svečanu sjednicu večeras u 18 sati. Zahvaljujem na učešću u radu.“

Sjednica je završena u 12,40 sati.

ZAPISNIČAR
Behara Hadžić

SEKRETAR
Omer Hadžić

PREDSJEDAVAJUĆI
OPĆINSKOG VIJEĆA
dr. Ferid Konjić

Službena zabilješka:

Zapisnik je usvojen na 36. redovnoj sjednici Općinskog vijeća Doboj Istok održanoj dana 30.05.2020. godine.

U Klokotnici, dana 01.06.2020. godine

Zabilješku sačinio
Omer Hadžić, sekretar Općine